

清史綱要

五



清史綱要卷之十

道光元年辛巳。二月辛卯。雲南永北廳屬夷人滋事。命總督慶保勤之。戊戌。協辦大學士吳璥以疾乞休。允之。

命孫玉庭協辦大學士。仍留兩江總督任。

三月辛酉。葬仁宗睿皇帝於昌陵。

四月庚寅。授呢瑪善爲欽差大臣。督辦雲南永北軍務。

大學士三等侯明亮以疾致仕。命在家食俸。

甲辰。慶保等奏勦洗大姚拉古夷巢。全境肅清。永北首逆瞎眼唐老大就擒。

五月。命伯麟爲體仁閣大學士。兼管兵部。以長齡協辦大學士。仍留陝甘總督任。

丙寅。命廣西按察使潘恭辰冊封越南國王阮福皎。

六月甲申。安定門災。

八月丁亥。命吏部尙書松筠在軍機處行走。

九月乙亥。命停閩省歲進荔枝樹素心蘭二項。永遠不必進呈。

十月己卯。帝御乾清門聽政。自是以爲常。

十二月癸巳。吏部尙書劉鏞之卒。予諡文恭。鏞之。統勳孫也。

道光二年壬午。正月。命凡旗人抱養民人之子爲嗣者。遇選八旗秀女時。其女俱不得入選。著爲令。

山西巡撫葉世倬奏。山西省州縣丁徭銀兩未歸入地糧攤徵者。尙有孟縣等二十一州縣。得旨。自道光二年起。一律攤入。

二月。命廣東督撫暨海關監督。派委員弁。認真巡查出口洋船。不准偷漏銀兩。並飭海關監督。有無收受鴉片煙重稅。據實奏聞。

閏三月庚子。賜戴蘭芬等二百二十二人進士及第出身有差。

五月。陝甘總督長齡奏。青海番人蘊依等作亂。官兵搜捕。已一律肅清。帝以歲功迅速。賞長齡雙眼花翎。

壬寅。停止巡漕御史。

六月。大學士伯麟以原品休致。

禧恩等參奏松筠刪改理藩院奏稿。大學士等議革職發往新疆。帝命降爲員外郎。

甲子。申禁直省各衙門額外增置書役。

戊辰。命長齡爲文華殿大學士。兼管理藩院事。以戶部尙書英和協辦大學士。

七月。予告大學士三等襄勇侯明亮卒。予謚文襄。明亮少時。尙履親王郡主。王母妃薨。奉移之東陵。道路積潦。輿夫皆憚行。明亮躬行泥淖。嚮導。昇夫不從令者。以杖撻之。在道數日。隊仗整肅如行軍。王喜。歎曰。吾壻將材也。

八月癸卯。河南新蔡教匪朱麻子滋事。命程祖洛捕治之。

長齡以奏報勦番不實。召來京。以那彥成署陝甘總督。

九月乙酉。四川果洛克番人作亂。提督桂涵討平之。涵以平教匪立功。與羅思舉

齊名時人號曰羅桂。

十月癸亥。申禁收漕州縣書役侵漁各弊。並禁漕總名目。

十一月丙戌。帝奉皇太后懿旨。立繼妃佟佳氏為皇后。

十二月戊申。申諭海口各關津。嚴拏夾帶鴉片煙。

道光三年癸未。正月壬午。帝幸圓明園。奉皇太后居綺春園。

乙未。命大學士長齡在軍機大臣上行走。

四月甲子。賜林召棠等二百四十六人進士及第出身有差。

五月乙亥。諭嗣後直省徵收錢糧。將墊完民欠名目。永遠革除。

六月戊午。永定河溢。

壬戌。北運河決。

七月。杖太監曹進喜。以其私令吏部開道府名單送閱。有違定制故也。

河南漳河溢。

八月戊戌。定失察鴉片煙條例。

九月丁丑。永定河漫口合龍。

十二月。以陝西南山地方安靜。加陝西道嚴如煜按察使銜。如煜嘗言山內州縣距省遠。鞭長莫及。宜仿古梁州自爲一道。及明設鄖陽巡撫之例。專設大員鎮撫。而割三省邊郡州縣以附益之。庶勢專權一。可百年無患。以更張重大。議格不行。道光四年甲申。四月壬寅。命程含章會同蔣攸銛籌辦直隸河工。

嚴禁幕友濫邀議敘。

七月。命毀蘇州府城西楞伽山五通祠。

辛巳。大學士戴均元以年老乞休。允之。

閏七月丁未。命孫玉庭爲體仁閣大學士。以蔣攸銛協辦大學士。均留總督任。八月己巳。試翰林詹事等官。擢朱方增等五員爲一等。餘升黜留館有差。

丙戌。予告大學士伯麟卒。予諡文愼。

十月。予告大學士章煦卒。予諡文簡。

丙戌。命福建臺灣道兼管臺營水陸官兵。

十一月。命兵部尙書玉麟在軍機大臣上行走。

十二月。以黃河泛溢。革河督張文浩職。在工次枷號一箇月。滿日發往伊犁效力贖罪。兩江總督大學士孫玉庭革職留任。

道光五年乙酉。三月壬寅。諭各督撫飭禁獄卒陵虐監犯。

五月丁酉。諭戶部尙書黃鉞年逾七旬。著無庸在軍機處行走。王鼎著在軍機處行走。

六月。命蔣攸銛爲體仁閣大學士。仍留直隸總督任。以禮部尙書汪廷珍協辦大學士。

諭軍機大臣等。御史汪世絨奏請防糧船水手設教。斂錢流弊一摺。據稱各幫糧船舵手。設有三教。一曰潘安。一曰老安。一曰新安。所祀之社名曰羅祖。每教內各

有主教名曰老官。每幫有老官船一隻。供設羅祖。入其教者。投拜老官爲師。各船水手。聯名資助。統計三教。不下四五萬人。沿途繚手。尙不在此數。水手雇直。向例不過一兩二錢。近年挾制旗丁。每名索二三十千不等。及銜尾前進。忽然停泊。老官傳出一紙。名曰溜子。索添價值。旗丁不敢不從。水手滋事。必送老官處治。輕則責罰。重則立斃。沈入河中。沿途招雇繚手。必推曾經械鬪受傷者爲頭目。遇有爭鬪。以紅箸爲號。人卽立聚。新安一教。尤多匪徒。宜設法嚴辦等語。糧船水手。膽敢設立教名。斂錢聚衆。不法已極。著漕運總督。及有漕各省督撫。應如何示以懲創。俾運官旗丁。不受挾制。悉心籌議以聞。

九月庚戌。申定世職人員犯賊革職。子孫不准承襲例。

十月。以大學士長齡署伊犁將軍。初嘉慶二十五年。回民張格爾作亂。命伊犁將軍慶祥往勦。具得南路參贊大臣斌靜激變狀。以永芹代之。芹亦未能撫馭。張格爾屢糾布魯特數百騷掠近邊。官兵往捕輒遁。領隊大臣巴彥圖以兵二百出塞。



四百里掩之。不遇。卽縱殺游牧之布魯特妻子百餘而還。無復行列。其酋沃列克恨甚。率所部二千。追覆官兵於山谷。勢遂猖獗。帝命慶祥俟長齡到任後。迅速前往喀什噶爾。會同永芹。相機妥辦。

十一月庚子。命大學士蔣攸銛在軍機大臣上行走。

癸卯。命慶祥總辦喀什噶爾軍務。

道光六年丙戌。二月庚午。禁各省佐雜教職干預公事。

三月初次試行海運。

四月丙子。賜朱昌頤等二百六十五人進士及第出身有差。

五月丁酉。雲貴總督趙愼畛卒。予謚文恪。愼畛方嚴嫉惡。病中疎劾貪墨吏數十人。閱日屬續。代者發急遞追回。滇人皆痛惜之。

六月。臺灣粵民黃文潤作亂。福建水師提督許松年馳往查辦。

七月。授長齡揚威將軍。楊遇春武隆阿俱爲欽差大臣。參贊軍務。督勦逆回。以鄂

山署陝甘總督。

乙巳。命盧坤馳往甘肅。同鄂山督辦糧運。

八月。閩浙總督孫爾準奏。抵臺查辦北路械鬪情形。及參辦理錯誤之提鎮副將等。奉旨革提督許松年職。留臺差遣效力贖罪。

十月。長清等奏喀什噶爾漢城於八月二十五日失守。慶祥死之。先是。六月間。張格爾率安集延布魯特五百餘。由開齊山路。突至回城。拜其先和卓木之墓。回人所謂瑪雜也。距喀城八十餘里。慶祥令協辦大臣舒爾哈善。領隊大臣烏凌阿。以兵千餘。勤之。殺敵四百。敵退入大瑪雜內。官兵攻之。突圍出。各回部響應。旬日萬計。慶祥盡調各營卡兵還喀城。爲三營。令烏凌阿穆克登布分將之。迎戰渾河。先後沒於陳。官兵隔敵不得入城。東走阿克蘇者七百人。喀城旋陷。慶祥自縊。英吉沙爾葉爾羌和闐三城繼之。

十一月己丑。臺灣餘匪悉平。

十二月御定宗室世次命名用溥毓恆啓四字。

道光七年辛亥二月長齡等奏克復喀什噶爾張格爾遁去先是回衆陷西四城。偏渾巴什河距阿克蘇四十里達凌阿自庫車巴哈布自哈拉先後來援並分兵援烏什攻其渡河之衆禽斬三百東四城始無恐我兵於二月六日出師十四日至巴爾楚軍臺喀葉兩城分道處也留兵三千以防兩路繞襲之敵分軍爲三隊楊遇春將中軍武隆阿左楊芳右敵遇戰輒敗走進至洋達瑪河距喀城八十里次日整隊至渾河北岸會大霧晦長齡欲須霽而進楊遇春不可乃遣索倫千騎繞趨下游牽敵勢而自率親兵驟渡上游據上風前鋒先扛礮轟敵礮勢與風沙勢相并若百十萬兵摧壓驟至敵陣亂比曉我兵盡渡風止霧霽乘勢衝入敵陣敵土崩我軍乘勝抵喀什噶爾時三月朔也三城旋以次皆復帝以張格爾遁去長齡奪紫纒楊遇春武隆阿奪太子太保少保銜仍勒限追捕命留官兵八千防喀城其餘兵九千卽隨楊遇春入關以楊芳代爲參贊長齡武隆阿均奏請以西

四城封和卓木子孫。帝怒。二人俱革職留任。未幾。復命直隸總督那彥成。以欽差大臣赴回疆。代長齡籌善後。

五月丁亥。命穆彰阿在軍機大臣上學習行走。

七月。協辦大學士禮部尚書汪廷珍卒。予諡文端。廷珍直上書房久。帝在潛邸。曾從講學。於其沒也。恩禮甚厚。

丁巳。以吏部尚書盧蔭溥協辦大學士。

英和以事革職。賞二品頂戴。補授熱河都統。以富俊爲理藩院尚書。協辦大學士。八月己丑。以張格爾日久未獲。革長齡楊遇春楊芳武隆阿職。

十月。諭惇親王縣愷退出內廷行走。并革去宗人府宗令。以潛匿脫逃太監故也。道光八年戊子。正月。長齡等奏生擒張格爾。張格爾敗後。傳食諸部落。諸部落漸不能供。生計日蹙。時中國購求張格爾者。爵親王。金十萬。長齡等密遣黑回出卡。縱反間。言官兵全撤。喀城空虛。諸回翹首以望和卓。其白回從張格爾出卡者。家

室皆令出卡。以離其心。張格爾果復率步騎五百。欲乘官兵除歲不備。入卡煽衆。潛襲喀城。長齡楊芳嚴兵以待。敵由開齊山舊路。潛入阿木古回城。白回奔竄。黑回要拒。敵知有變。卽奔出卡。楊芳率兵三路星夜追至喀爾鐵蓋山。擊斬殆盡。張格爾僅餘三十人。棄騎登山。副將胡超都司段永福等禽之。捷聞。詔封長齡二等威勇公。楊芳三等果勇侯。均賞戴雙眼孔雀翎。阿克蘇貝子伊薩克晉封郡王。其將士胡超以下。賞賚有差。

九月。以寶華峪地宮滲水。大學士英和革職。發黑龍江充當苦差。致仕大學士戴均元入京候訊。旋免其發遣。驅逐回籍。

道光九年己丑正月。禁用光中通寶景盛通寶景興通寶景興巨寶景興大寶嘉隆通寶各種錢文。

二月。命回子當阿渾者。止准念習經典。不准干預公事。其阿渾子弟有當差及充當伯克者。不准再兼阿渾。以示限制。

四月戊子。賜李振鈞等二百二十一人進士及第出身有差。

七月辛丑。武隆阿以奏對喀什噶爾軍務情形。語多掩飾。降爲頭等侍衛。

八月庚辰。帝奉皇太后詣盛京謁祖陵。

十月乙酉。帝還京師。

十一月己酉。定一子兩祧服制。

道光十年庚寅。閏四月。禁各省實缺人員赴省逗留。

五月。御史王璋慶奏請裁革州縣白役。得旨。地方差役至繁地方。不得過八十名。其餘以次遞減。所有白役。概行禁革。

六月癸卯。定查禁內地行銷鴉片章程。

九月。回疆復亂。以楊遇春爲欽差大臣。命都統哈朗阿赴回疆協勤。張格爾旣就擒。回人復奉其兄玉素普爲和卓。糾衆數千入寇。回郡王伊薩克及客民。先後密報參贊大臣扎隆阿。皆不信。旣聞警。始令幫辦大臣塔新哈禦之。又令副將賴永

貴以兵千六百夾勦。皆敗沒。敵遂猖獗。時璧昌爲葉爾羌辦事大臣。盡徙城外商民於城內。傳集各回伯克。諭以禍福利害。選派回兵。分防各要隘。每路各守以兵勇二百。回兵一二千。部署甫定。而敵圍喀英二城後。卽分隊由草湖來寇葉城。璧昌選回兵千餘。屯回漢二城。中路官兵四百。陣東門外。禽斬三百餘。又擒撲入回城者三百餘。敵退走三百里外。僅陣亡我兵一人。回兵五人。詔賞璧昌副都統銜。餘將士分別獎勵有差。

丁卯。命大學士公長齡爲欽差大臣。馳往新疆督辦軍務。

命盧蔭溥爲體仁閣大學士。以李鴻賓協辦大學士。仍留兩江總督任。

兩江總督大學士蔣攸銛。以辦理私梟黃玉林。苟且了事。革職。以侍郎降補。

十月。仍授長齡爲揚威將軍。命哈琅阿楊芳參贊軍務。

兩淮鹽務。改歸總督管理。命將鹽政一缺。卽行裁撤。

道光十一年辛卯。正月。逮伊犁參贊大臣容安治罪。以哈豐阿代之。容安奉命解

喀葉二城之圍。擁重兵八九千。反繞道烏什。趨和闐。致喀葉圍久而不解。各回城。子女玉帛。搜括殆盡。命押解刑部監禁。旋免死。發往吉林充當苦差。提督哈豐阿奉命管領烏嚕木齊官兵。駐紮阿克蘇。以喀城危急。帶兵三千五百至。破敵步騎二千於哈拉布札什。遂進至英吉爾河。敵竄去。喀圍亦解。既而哈朗阿楊芳亦至。二月。命長齡查訪逆回起釁根由。奏稱那彥成驅逐安集延。查鈔家財。斷離眷口。禁止大黃所致。命革那彥成職。

三月己未。廣東黎匪滋事。命李鴻賓等勦之。

四月庚戌。李鴻賓奏黎匪韋色容等伏法。地方肅清。

五月。陶澍奏淮北商力積疲。請暫籌借項。官督商運。詔從之。

六月。禁沿邊夷民私種罌粟。

七月。喀什噶爾參贊大臣扎隆阿以誣奏回子郡王銜阿奇木伯克伊薩克謀逆。解京廷訊。命在阿克蘇枷號兩個月。交刑部監禁。秋後處決。



癸丑。高郵湖河溢。

己卯。命穆彰阿朱士彥往江南查辦賑災。

九月。新疆始行屯田法。從長齡請也。

十一月丙辰。大學士托津以病免。

十二月乙酉。命富俊爲東閣大學士。管理兵部。以吏部行書文學協辦大學士。行票鹽法。從兩江總督陶澍請也。

道光十二年壬辰。正月癸丑。停向來盛京五部侍郎。及各省將軍都統副都統城守尉總管等年班輪替進京之例。

以喀什噶爾善後大局已定。撤滿漢官兵歸伍。

丁丑。定白陽白蓮八卦紅陽等教首犯遇赦不赦。從犯亦不准援減例。

二月。盧坤及海凌阿奏。湖南江華縣錦田鄉。獠人趙金龍作亂。時楚粵奸民結天地會。屢強劫糶寨牛穀。黨連官役。獠無所愬。金龍妖煽其峒。倡言復仇。使趙福才

糾廣東散猺三百餘。合湖南九冲猺。共六七百人。焚掠兩河口。殺會匪二十餘。官兵討之。毀其巢。斃三百餘人。猺竄藍山之五水。猺山所至虜脅。衆二三千。圖據九巖山巢穴。參將成喜以百兵扼要路。衆寡不敵。猺人遂旁掠寧遠。

乙未。閩浙總督孫爾準卒。予諡文靖。

三月。湖南提督海凌阿陣亡。予一等輕車都尉世職。藍山告急。海凌阿率副將馬韜。以兵五百餘進剿。冒雨深入。又不爲備。伏兵四起。乘高下突。皆戰死。命盧坤及湖北提督羅思舉。貴州提督余步雲會師進剿。

庚午。命戶部尙書禧恩。盛京將軍瑚松額。馳赴湖南。勦辦猺人。

四月。長齡等奏。卡外諸夷進卡貿易。懇恩一體免稅。允之。

盧坤率師至永州。猺已裹脅萬人。分爲三路。每路二三千。犄角出沒。詔以猺皆山氓。趨捷負險。恐蔓延兩粵。或盤踞山峒。致稽搜捕。勅諸將誘至山外平野之地。聚而殲之。羅思舉建議。大兵由新田後路潛躡。遏其南竄。與桂陽北路兵夾攻。並扼

其西通道州零陵桂陽小路。於是三路猺爲官兵驅逼出兵。皆東竄常寧之洋泉鎮。思舉以猺逼歸一路。且失其翻山長技。乃密檄北路兵齊赴。又漸移各守隘。兵進逼合圍。連日殲猺六千。趙金龍突圍中槍死。擒其子弟妻女。及死黨數十。奏聞。詔以盧坤羅思舉蕩平迅速。各予一等輕車都尉世職。禧恩瑚松額已抵衡州。未至軍。先三日奏捷。禧恩詰趙金龍死狀虛實。思舉旋獲其尸。及所佩劍印木偶。乃止。

給事中隆勛以奏請拏辦會匪王老子卽王法中習教一案。超擢太常寺卿。辛丑。賜吳鍾駿等二百六人進士及第出身有差。

五月乙丑。諭各督撫遇有題調缺出。先儘正途。不得以佐雜應升人員超越。淮北試行票鹽。從兩江總督陶澍請也。

七月乙丑。廣西賀縣猺匪盤均華等滋事。祁墳遣兵勦平之。

八月。廣東八排猺作亂。官兵勦之。失利。都司以下死者數十人。兩廣總督大學士

李鴻賓以硝藥失火焚傷入奏。詔革職交部治罪。旋發往新疆。以禧恩暫署兩廣總督。

命阮元協辦大學士。仍留雲貴總督任。

九月。桃南廳屬于家灣河堤爲湖民盜決。命穆彰阿往江南。會同陶澍查辦。奪河督張井職。

戊午。禧恩奏各排冲縛獻首匪。率衆投誠。猺山全境肅清。詔進禧恩不入八分輔國公。瑚松額余步雲均世襲一等輕車都尉。李鴻賓旣得罪。詔盧坤補授兩廣總督。禧恩聞其將至。急欲以平猺爲功。而猺洞天險不易攻。乃使按察使楊振麟設法招降。賂以洋銀鹽布。猺貪利踵至。旬日得數百人。會獲黃瓜寨附近猺人。諸將得以草草歲事。迨盧坤至。遂以善後事委之。交印卽行。帝嘉其辦理迅速。而其受降始末。竟不上聞云。

閏九月丁酉。飭河南湖北等省會拏搶匪。

清史綱要 卷十  
戊戌。飭江西巡撫嚴拏會匪。

十月。廣東曲江乳源兩縣土盜。勾結猺匪滋事。盧坤派兵勦平之。

戊辰。福建臺灣嘉義縣陳辦等滋事。命程祖洛馳往勦辦。

十一月戊寅。命署福州將軍瑚松額爲欽差大臣。都統哈琅阿爲參贊大臣。馳往臺灣勦辦。

道光十三年癸巳。正月。陳辦就擒。提督馬濟勝封二等男世職。

辛丑。桃南廳于家灣河工合龍。

二月己未。四川越嶲廳等處夷人滋事。命那彥寶桂涵等勦辦。

己革直隸總督那彥成卒。贈尙書銜。予諡文毅。釋其子容安回旗。

三月。尢大學士盧蔭溥致仕。

乙酉。四川提督桂涵卒於軍。予諡壯勇。

四月己酉。命潘世恩爲體仁閣大學士。

己巳。皇后崩。

五月辛未。賜汪鳴相等二百二十人進士及第出身有差。

己丑。四川犍邊廳夷人桑樹格等就擒。餘衆皆降。

六月乙巳。申禁各省將弁違例坐轎。

七月甲申。試翰林詹事官擢田嵩年等三員爲一等。餘升黜留任有差。

四川越巂夷一律肅清。

乙未。禁外省道府州縣餽送京官別敬。

九月。以四川勤平夷人功。晉封楊芳一等果勇侯。

十一月。禁各省督撫。概不准以本省屬員入募襄理。

道光十四年甲午。正月丁亥。命大學士潘世恩在軍機大臣上行走。

二月庚申。申禁坊肆售賃淫書小說。

乙丑。大學士富俊卒。予諡文誠。

清史綱要 卷十  
三月丙寅。以實缺人員告假捏飾規避。申嚴出結官處分。

七月甲戌。四川綏邊廳十三支赤夷內雅扎等支夷滋事。命瑚松額楊芳等查辦。  
戊子。東河朱家灣漫口。命鍾祥堵治之。

庚寅。申禁各州縣佐雜丞倅擅受詞訟。

八月。瑚松額奏辦理夷案完竣。

以英吉利兵船闖入內河。兩廣總督盧坤革職留任。戴罪督辦。水師提督李增階革職。

九月丁丑。永定河溢。命琦善督辦。

十月。諭盧坤等驅逐洋面躉船。並申禁內地匪徒勾結販運鴉片。

己酉。冊立皇貴妃鈕祜祿氏爲皇后。

十一月。命文學爲東閣大學士。管吏部事。穆彰阿爲吏部尙書。協辦大學士。

十二月。以四川綏邊夷人出巢焚搶。提督楊芳交部嚴加議處。卽來京聽候部議。

旋降爲二等侯。革退御前侍衛。以總兵前往甘肅候補。

道光十五年乙未。正月壬戌。以皇太后六旬萬壽。詔開恩科。

甲子。大學士曹振鏞卒。予諡文正。

禁學政閱文幕友。不得專用本籍之人。

大學士長齡以擅受霍罕夷使呈遞稟詞。交部議處。尋降四級留任。

二月己亥。命阮元爲體仁閣大學士。管理刑部。以戶部尙書王鼎協辦大學士。

三月。山西趙城縣教匪曹順作亂。知縣楊延亮全家遇害。

四月。鄂山奏官兵進剿峩邊廳屬雅扎等十三支夷人。合境肅清。

甲寅。賜劉繹等二百七十二人進士及第出身有差。

趙城縣教匪曹順於觀城縣境內偵獲。並其黨八十二人。先後凌遲斬決戮屍。傳

首梟示。

五月。陝甘總督楊遇春以病懇請開缺回籍。命加封一等侯爵。在家支食全俸。



海 文 綱 要 卷 十  
辛巳。休致工部侍郎前任大學士松筠卒。予諡文清。松筠以筆帖式起家。累官至大學士。中間屢起屢蹶。性坦率無城府。厭苛禮之官。常不挈眷屬。卽至亦處之別院。扃其門。每旦入院禮佛。坐堂中。與夫人啜茗閑話而已。自伊犁將軍入長吏部。單騎雜喇嘛中。抵圓明園。家人出迎於近郊。不知其已至也。

六月癸卯。諭滿洲蒙古文職二品以下及五六品京堂各員。著自本月十九日起。各按單開。輪日在圓明園宮門。伺候考試。俱不准託故不考。

乙卯。申禁各省濫委佐貳佐雜署理州縣積弊。

七月甲辰。大學士文孚以兩耳重聽。面請解職。命以大學士管理吏部。無庸在軍機大臣上行走。

八月癸酉。山東巡撫鍾祥奏。英吉利船隻駛入東省劉公島洋面。派委員弁巡堵。不准進口。命直隸奉天江南山東福建浙江各督撫府尹等。嚴飭沿海文武員弁。巡防堵截。並嚴禁內地奸民交易接濟。

兩廣總督盧坤卒。予謚敏肅。

十月癸未。予告大學士託津卒。予謚文定。

道光十六年丙申。二月。湖南武岡州瑤人藍正樽作亂。命訥爾經額勦辦。

四月。訥爾經額奏勦捕武岡州滋事瑤人。已就肅清。

丁丑。賜林鴻年等一百七十二人進士及第出身有差。

七月甲午。禁外省州縣設立班館。

丙申。大學士文孚以年衰乞免。允之。

庚子。命穆彰阿爲武英殿大學士。管理戶部。以琦善協辦大學士。仍留直隸總督任。

九月戊申。圓明園三殿災。

己酉。降尙書耆英爲侍郎。以其不行拒絕太監請求故也。

十月。兩江總督陶澍以私刊奏疏。降四級留任。

道光十七年丁酉三月。予告陝甘總督一等侯楊遇春卒。予諡忠武。遇春結髮從戎。大小數百戰。皆陷陳冒矢石。或冠翎皆碎。袍袴皆穿。未嘗受毫髮傷。帝嘗詢及。歎爲福將。

六月戊午。命左都御史奎照戶部侍郎文慶在軍機大臣上學習行走。

四川馬邊廳夷人滋事。命鄂山勦辦。

癸酉。訥爾經額奏。拏獲從逆各犯。究出首逆藍正樽被鄉勇毆斃情形。帝以所奏不實。命來京聽候部議。旋以三等侍衛充駐藏大臣。

七月。命山東鹽務改歸巡撫管理。

十月辛未。停吉林採珠例貢。

十一月。四川涼山夷人滋事。成都將軍凱音布總督鄂山討平之。

道光十八年戊戌。正月乙亥。大學士一等公長齡卒。予諡文襄。

二月癸卯。命琦善爲文淵閣大學士。仍署直隸總督。以雲貴總督伊里布協辦大

學士仍留任。

四月丙寅。賜鈕福保等一百九十四人進士及第出身有差。

閏四月辛巳。鴻臚寺卿黃爵滋奏請嚴禁鴉片。詔各直省將軍督撫妥議具奏。  
乙丑。禧恩以管理奉宸苑事廢弛。革兵部尙書職。

五月癸丑。大學士阮元以年老乞休。允之。

命王鼎爲東閣大學士。仍管刑部。調湯金釗爲戶部尙書。協辦大學士。  
戊辰。惇親王緜愷。以違例囚禁多人。復將優匿府內。降爲郡王。

九月丙午。莊親王奕劻輔國公溥喜。因赴尼僧廟內吸食鴉片煙。奕劻革去王爵。  
溥喜革去公爵。

太常寺卿許乃濟請弛煙禁。降爲六品頂帶。卽行休致。

十月。命河南衛輝府所奉無生老母塑像。由該撫派員全行拆毀。  
十一月壬寅。嚴禁雲南種植罌粟。

癸丑授湖廣總督林則徐欽差大臣。馳驛前往廣東查辦海口事件。所有該省水師兼歸節制。先是詔各省將軍督撫會議禁煙章程。則徐所奏尤剴切。言煙不禁絕。國日貧。民日弱。十餘年後。豈惟無可籌之餉。抑且無可用之兵。帝謂爲深慮遠識之言。故有是命。

申禁旗人婦女效漢人纏足者。將其家長治罪。

貴州匪徒謝法眞作亂。雲貴總督伊里布討平之。

道光十九年己亥正月。以奎照氣體不充。罷軍機大臣。

二月壬午。試翰林詹事等官。擢李國杞四員爲一等。餘升黜留館有差。

三月。林則徐以是年正月馳抵廣東。傳集十三洋行。發交諭帖。令轉諭各洋公司人等。並辜校其煙土存儲之實數。飭令即時稟覆。英官義律先知其事。託以回澳門住。久不至。各洋商觀望推諉。遷延不覆。趣之急。義律始乘舟來省。仍置不理。則徐乃停其貿易。又撤其沙文而羈禁之。沙文者。漢人之受雇於洋館。充其買辦者。

也。義律不得已。乃將洋面躉船上所存之煙土。據實呈繳。計二萬二千八十三箱。則徐會同總督鄧廷楨。親駐虎門驗收。每箱約賞茶葉三斤。其煙土請解京師。詔卽在海口銷燬。則徐下令盡逐外洋之躉船。凡進口之船。均應具結。有夾帶鴉片者。船貨沒官。人卽正法。他國皆遵具結。惟義律不肯。則徐與鄧廷楨嚴令不許逗留。義律乃率其眷屬及在澳英人五十七家。同寄居尖河嘴貨船。詔以林則徐查辦妥協。交部從優議敘。

五月。予告大學士盧蔭溥卒。予諡文肅。

六月丁亥。前任兩江總督陶澍卒。予諡文毅。

辛卯。調周天爵爲湖廣總督。

十二月癸亥。調林則徐爲兩廣總督。

己卯。調伊里布爲兩江總督。

癸未。命刑部尙書隆文在軍機大臣上行走。

清史綱要 卷十  
甲申。調鄧廷楨爲閩浙總督。桂良爲雲貴總督。

命戶部侍郎文慶無庸在軍機處行走。

道光二十年庚子。正月壬寅。皇后崩。

二月丁卯。戶部尙書何凌漢卒。予諡文安。

丁丑。河東河道總督栗毓美卒。予諡恭勤。毓美治河有功。始倡以輒代石之法。後世師之。

三月辛亥。湖北提督羅思舉卒。予諡壯勇。思舉嘉慶中以鄉勇從軍四川。起家至節鎮。威名亞二楊。軍中嘗號爲羅必勝。言晦夜刦營必勝。崖溝間道必勝。冒旗誘敵必勝也。

四月乙酉。賜李承霖等一百八十人進士及第出身有差。

五月己亥。諭各省藩臬運司道府出缺。不得以隔品及試用人員濫行署理。

六月己巳。己革協辦大學士英和卒。賞三品卿銜。

大理寺卿曾望顏奏請封閉禁海。盡停各國貿易。帝欲從之。林則徐力言不可。且言各國不犯禁之人。無故被禁。必且協而謀我。乃止。

林則徐既奉命總督兩廣。與水師提督關天培。協力守海口。屢挫敵兵。至是。英將伯麥率兵船十餘。加以印度駐防船艦二三十艘。至粵。林則徐奏聞。尙有以逸待勞。以主待客。彼何能爲之諭。則徐親赴獅子洋。校閱水師。號令嚴明。聲勢壯甚。洋船至粵月餘。無隙可乘。遂乘風赴各省。駛入福建廈門。不利。謀犯浙江。攻定海。陷之。浙江巡撫烏爾恭額奏聞。命兩江總督伊里布爲欽差大臣。赴浙江寧波視師。以裕謙署兩江總督。又命福建提督余步雲。赴浙江會辦洋務。

七月。革烏爾恭額職。旋定絞監候。以劉韻珂代之。

自定海失守後。漸有蜚語。上聞有謂上年廣東繳煙。先許價買而後負約。以致激變者。帝意始疑。敕沿海督撫。遇洋船投書。卽收受馳奏。適伯麥及義律。以五艘駛赴天津投書。多所要索。直隸總督琦善以聞。詔以琦善爲欽差大臣。赴粵查辦。革



林則徐鄧廷楨職。留粵聽勅。並敕沿海各省。不得開礮。

十二月癸酉。命賽尙阿在軍機大臣上行走。

乙巳。以裕謙爲欽差大臣。命伊里布回兩江總督任。會同提督陳化成。防堵江蘇海口。

江南鄉試正考官文慶。以私帶舉人熊少牧入闈革職。

命刑部尙書祁墳馳往廣東。督理糧臺。

道光二十一年辛丑。正月己丑。琦善奏英人入犯。沙角大角礮臺同時失守。琦善之至廣東。一切反林則徐所爲。謂可得外人歡心。而敵人則日夜增造小船。招集販煙之蜈蚣艇蟹艇數百。此外火箭噴筒竹梯攻具。增造不可勝計。水師提督關天培密請增兵。琦善惟恐其妨和議。固拒不許。義律乘其無備。突攻沙角大角礮臺。副將陳連升戰死。提督關天培及總兵李廷鈺游擊馬辰等。尙分守鎮遠威遠靖遠各礮臺。兵各僅數百。相向而泣。天培遣人至省城求增兵。圍城文武皆力求。

琦善置不問。惟日夜作書。遣漢奸鮑鵬持送義律。於償還煙價外。復以香港許之。並歸浙江俘人。以易定海。琦善與立契約。帝不許。琦善奏言粵省情形。稱地利無要可扼。軍械無利可恃。兵力不固。民情不堅。帝以琦善危言要挾。孤恩誤國。實屬喪盡天良。著卽革職鎖拏來京。所有家產。卽行查鈔入官。以祁墳代之。

甲午。命御前大臣領侍衛內大臣奕山爲靖逆將軍。戶部尙書隆文。湖南提督楊芳爲參贊大臣。馳赴廣東軍營。

二月。革大學士伊里布職。仍留兩江總督任。伊里布之抵浙江。帝誠以乘隙進。勤不得因琦善有不宜輕進之語。意存觀望。伊里布見英人勢盛。乃密奏不宜進兵。帝不悅。至是。乃奏英人全數起旋。定海業經收復。帝以其庸懦無能。故有是譴。旋入京。以裕謙代之。命寶興爲文淵閣大學士。仍留四川總督任。以吏部尙書奕經協辦大學士。

英人攻破虎門礮臺。提督關天培死之。

戊寅命齊慎爲參贊大臣赴粵會勘。

三月丙戌釋周天爵赴廣東軍營。

乙未致仕大學士文學卒。予諡文敬。

賞林則徐四品卿銜。馳赴浙江軍營。

閏三月協辦大學士吏部尙書湯金釗以事降四級調用。調卓秉恬爲吏部尙書。

協辦大學士。

召伊里布來京。以裕謙爲兩江總督。

英人攻四方礮臺。陷之。遂直攻廣州省城。礮聲如雷。晝夜不息。將軍以下皆避入

巡撫署。議使廣州知府余保純出城講款。義律立索軍餉銀六百萬圓。煙價在外。

香港再議。將軍等一切允之。城上改樹白旗。先令洋商出二百萬圓。餘於運庫藩

庫海關庫發給。洋兵下山回船。義律卽促將軍參贊離城。奕山隆文退兵屯金山。

離省河數十里。先撤回湖南兵。惟楊芳等仍留廣州彈壓。隆文於講和時卽憤恚

成疾。及抵金山。不數日卒。奕山飾詞入告。猶以義律窮蹙乞撫。求准照舊通商。帝亦微聞之。不之詰也。

四月己酉。賜龍啟瑞等二百二人進士及第。出身有差。

五月癸亥。革林則徐四品卿銜。發往伊犁效力贖罪。

六月庚寅。革伊里布職。發軍臺效力贖罪。

刑部奏琦善應照守備不設失守城寨律。擬斬監候。得旨。著照所請。秋後處決。

癸卯。河南下南廳祥符汛河溢。革河督文冲職。枷號河干。旋發往伊犁。以朱襄代之。

七月乙卯。命林則徐折回東河。效力贖罪。

命大學士王鼎等赴東河督辦大工。

戊辰。賞前任寧夏將軍特依順都統銜。作爲參贊大臣。赴廣東辦理洋務。

庚辰。英兵船闖進福建青嶼口門。廈門失守。先是。洋艘之攻廈門也。鄧廷楨督同

兵備道劉耀春。止守舊礮臺。疊沙垣。據形勢。故不能破。及顏伯燾繼之。又於口外之崑嶼青嶼大小檔。增建三礮臺。備多力分。新鑄大礮。又多未就。及洋兵至。專攻一臺。一臺破。再攻一臺。將士死傷相繼。遂注攻大礮臺。飛礮從空墜岸上。顏伯燾退至同安。洋人得廈門。亦不守。不數日。全隊駛往浙江。顏伯燾遂以收復廈門奏。詔降顏伯燾三品頂戴。仍留總督任。命怡良馳赴福建查辦。

八月。方英人之議和於粵也。繳還定海。帝命江浙各省撤兵裁餉。裕謙以兩江總督充欽差大臣。專辦浙事。甫行至鎮海。已聞廈門失守之信。於是飛檄定海總兵葛雲飛。會同處州鎮總兵鄭國鴻。壽春鎮總兵王錫朋。統各鎮兵五千。前赴定海。扼其內犯之路。英將濮鼎查。郭士利等。果由廈門再犯定海。三總兵皆戰死。帝謂其以四千殘師當二萬巨寇。惋惜久之。均飭部從優議卹。

鎮海陷。欽差大臣裕謙死之。定海既失。鎮海僅餘兵四千。裕謙守城內。遣余步雲守城外招寶山。余步雲有異志。不許士卒開礮。及洋兵由山麓攀援登岸。余步雲

卽率兵西走。洋兵據招寶山。俯攻鎮海。裕謙知事不可爲。令副將豐伸齋欽差大臣關防。送浙江巡撫。自沈泮池。死之。旋寧波失守。慈谿餘姚二城皆逃散一空。

九月乙卯。命協辦大學士奕經爲揚威將軍。副都統特依順侍郎文蔚爲參贊大臣。馳赴浙江辦理軍務。

釋奕紀往廣東軍營。效力贖罪。

己未。實授牛鑑兩江總督。

命戶部尙書祁寯藻在軍機大臣上行走。

十月。臺灣鎮達洪阿等奏。英船人犯臺灣。堵禦獲勝。英人乘廈門之捷。以兵駛進雞籠口。臺灣鎮達洪阿與兵備道姚瑩協力抵禦。英兵改犯大安港。達洪阿姚瑩以計誘之入口。爲暗礁所擊。擱淺中流。官兵鄉勇乘危邀擊。遂俘其衆。捷聞。賞達洪阿太子少保銜。姚瑩加二品頂戴。

道光二十二年壬寅正月。湖北崇陽縣匪徒鍾人杰等作亂。官兵討平之。

二月丙戌。命林則徐仍發往伊犁效力贖罪。

祥符大工合龍。

賞伊里布七品頂帶。赴浙江軍營。奕經進攻寧波。大敗。劉韻珂遂奏請伊里布來浙主款。帝復命宗室尙書耆英爲欽差大臣。署理杭州將軍。與參贊齊慎同赴浙。降旨不許進兵。並不許擒斬洋人。有兵勇殺一洋兵。卽行正法。皆劉韻珂所奏請也。

四月。奕經奏收復寧波郡城。英人旣得志於浙。遂北窺長江。於三月二十七日。棄城登舟。鎮海洋船亦棄城而北。犯乍浦。陷之。伊里布至乍浦。洋船議款。英人要挾甚侈。不能成議。

五月己酉。命伊里布以四品頂帶署乍浦副都統。

大學士王鼎自殺。予諡文恪。鼎自河防歸爲遺疏數千言。極言穆彰阿等欺君誤國之罪。並薦林則徐可大用。遂服藥自盡。穆彰阿使人以危言恫其子。竟不得上。

命兵部右侍郎何汝霖在軍機大臣上學習行走。

英人攻陷寶山。江南提督陳化成死之。寶山城在吳淞口外。洋面寥闊。知縣周恭壽請伏兵口內。毋守海口礮臺。牛鑑不從。總兵王志元守小沙背之。徐州兵五百。卽在浙從余步雲棄招寶山之潰兵也。牛鑑不懲創之。反令守要害。終日騷掠。居民洶洶。周恭壽力請撤換他兵。亦不聽。英人來攻。陳化成礮沈其二艘。敵以小舟攻小沙背。徐州兵果望風西走。化成中礮死。牛鑑走嘉定。寶山遂陷。上海城逃走一空。而松江以提督尤渤統壽春兵二千固守。得不陷。化成予諡忠愍。

命賽尙阿爲欽差大臣。馳往天津。會同訥爾經額辦理防務。

六月己卯。命齊慎赴江蘇。扼要應援。

命伊里布回乍浦副都統任。暫留者英會同牛鑑。辦理江蘇防勦事宜。

英人由海入江。至鎮江。參贊大臣齊慎。湖北提督劉允孝。督兵禦於城外。見兵力不支。退守距郡四十五里之新豐地方。外援旣斷。英師距堙攻城。城中惟駐防一



軍差完。副都統海齡率以死守。攻之二日。不克。敵乃以火箭射入城中。延燒近城房屋。遂乘間架雲梯入城。海齡率家人自焚死。是時洋船八十餘艘。礮聲震江岸。自瓜洲至儀徵之鹽艘。估舶。焚燒一空。火光百餘里。揚州鹽商賂以銀五十萬緡。不及於禍。英兵直逼金陵。東南大震。

七月。英兵抵江寧城下。時伊里布初到。耆英方自浙起行。牛鑑飛書照會。以欽差已奉諭旨。永定和好。不日即可到省。伊里布復遣張喜至英舟。傳大府意。羈縻之。英將亦以要求各款。照會到省。一議索煙價。商欠戰費銀二千一百萬。一議准寄居貿易於廣州福州廈門寧波上海五港口。一議英人之有職者。與中國官員用平行禮。其餘則劃抵關稅。釋放漢奸等款。末請鈐用國寶。以昭誠信。要三帥刻日畫諾。耆英至。逐一照覆。由八百里馳驛奏聞。帝覽而憤甚。以其奏示軍機諸臣。時穆彰阿當國。力言兵興三載。糜餉勞師。無尺寸之效。勤之與撫。功費正等。而勞逸已殊。靖難息民。於計爲便。帝許之。七月初九日。耆英伊里布牛鑑親赴英將璞鼎

查之舟。越二日。璞鼎查馬禮遜亦入城。會於正覺寺。連日分提江寧蘇州藩庫揚州運庫銀數百萬。如數餽之。洋兵始出江而去。

庚午。江南桃北廳河溢。

九月。牛鑑革職。擊問。交刑部治罪。以耆英爲兩江總督。

召奕山來京。以伊里布爲欽差大臣。廣州將軍。辦理善後事宜。

癸亥。召奕經文蔚來京。命齊慎回四川提督任。

十月己卯。程楸采奏江豫捻匪竄入皖境。拒捕傷人。命江蘇安徽河南各督撫。分飭所屬文武員弁。四路兜擒。盡法懲治。

命奕山奕經文蔚俱交部治罪。特依順齊慎均交部嚴加議處。後奕山奕經依部議。均定爲斬監候。秋後處絞。文蔚特依順加恩。改爲革職留任。

乙未。命戶部尙書敬徵協辦大學士。

十一月。以英人控訴臺灣鎮總兵妄殺遭風被難洋人。冒功捏奏。命怡良渡臺查

辦。

已革兩江總督牛鑑定爲斬監候。秋後處決。

十二月。提督余步雲伏法。

賞琦善四等侍衛。爲葉爾羌幫辦大臣。

道光二十三年癸卯。正月丙辰。改浙江定海縣爲定海廳直隸同知。

二月乙未。廣州將軍伊里布卒。

三月庚戌。以耆英爲欽差大臣。赴廣東辦理通商事宜。

丁巳。試翰林詹事等官。擢萬青藜等五員爲一等。餘升黜留館有差。

乙丑。賞琦善三品頂帶。爲熱河都統。

丙寅。賞文蔚藍翎侍衛。爲古城領隊大臣。奕經四等侍衛。爲葉爾羌幫辦大臣。

戶部銀庫虧空事發。命王大臣查辦。

怡良奏請將達洪阿姚瑩解交刑部治罪。帝不許。舊制臺灣歸閩省管轄。以遠在

海外許專摺奏事。及雞籠之捷。飛章入告。閩督弗善也。會洋人縱謠言。謂臺中兩次俘獲。均係遭風難人。而鎮道乘危徼功。心所不服。愬之江浙閩粵四省大吏。脅令上聞。怡良奉命渡臺。正欲傳旨逮問。而臺中士民遠近奔赴。合詞申理。怡良懼激變。許爲直之。而私奏其一意鋪張。致爲藉口指摘。咎有應得。並逼取供詞。二人俱逮入都。幸帝卒鑒其枉。僅從革職。旋即起用。迨咸豐初年。頒示贍黃。特爲二人湔雪。其論遂定。

四月丁丑。御史陳慶鏞奏稱琦善等三人起用。爲刑賞失措。無以服民。帝嘉其亢直敢言。命琦善奕經文蔚均著革職。卽令閉門思過。以昭賞罰之平。

六月。雲南南甸土匪作亂。官兵討平之。

河南中牟河決。革河督慧成職。枷號河干。以鍾祥代之。旋命麟魁廖鴻荃往督辦。七月丁未。釋鄧廷楨回籍。旋賞三品頂帶。署甘肅布政使。

八月丁未。裁稽查崇文門稅務滿漢御史。

釋奕山回家。

十月戊申。賞奕經二等侍衛。爲葉爾羌參贊大臣。奕山二等侍衛。爲和闐辦事大臣。

庚戌。賞琦善二等侍衛。爲駐藏大臣。

甲子。予已革臺灣鎮總兵達洪阿三等侍衛。爲哈密辦事大臣。

道光二十四年甲辰。正月戊辰。以來歲皇太后七旬萬壽。詔開恩科。

二月庚戌。以中牟堵口復決。尙書麟魁廖鴻荃均革職。

釋牛鑑於獄。發往河南。交鄂順安差委。

三月壬申。諭。耆英見已調任兩廣總督。各省通商善後事宜。均交該督辦理。著仍頒給欽差大臣關防。遇有辦理各省海口通商文移事件。均准鈐用。

臺灣匪徒洪協等作亂。旋就執伏誅。

四月乙巳。諭軍機大臣。開礦一事。前朝屢行。雲南一省。除見在開採外。尙多可採。

之處。著寶興桂良賀長齡周之琦。體察地方情形。相度山場。民間情願開採者。准照見開各廠。一律辦理。斷不可假手吏胥。致有侵蝕滋擾阻撓諸弊。

辛酉。賜孫毓淮等二百九人進士及第出身有差。

五月辛巳。開採廣西北流鐵礦。

六月丁酉。直隸永定河溢。

七月湖南耒陽縣匪陽大鵬作亂。捕送京師伏誅。

九月乙酉。永定河隄工合龍。

申嚴武弁乘轎禁例。

道光二十五年乙巳。正月。中牟河工合龍。

二月。命兩廣總督耆英協辦大學士。

四月乙卯。賜蕭錦忠等二百十七人進士及第出身有差。

西寧番人作亂。總兵慶和被戕。命惠吉前赴甘肅。相機妥辦。

六月己未。江蘇中河廳桃源汎河溢。

九月。命林則徐回京。以四五品京堂候補。

十一月。以布彥泰爲陝甘總督。未到任前。命林則徐以三品頂帶先行署理。

道光二十六年丙午。三月。鄧廷楨卒。以林則徐爲陝西巡撫。

五月。前任湖南提督楊芳卒。予諡勤勇。芳與楊遇春齊名。天下稱二楊。及海疆事起。威名稍挫云。

閏五月。雲南永昌回人作亂。

戊戌。命端華襲鄭親王爵。並在御前行走。

八月。以雲南回匪日久未平。命李星沅爲雲貴總督。

十二月丙子。調鄭祖琛爲廣西巡撫。

賞琦善二品頂帶。授四川總督。

道光二十七年丁未。正月。緬人擾邊。

三月。李星沅奏。官兵圍剿回匪。擒獲首要各犯。餘匪漸就肅清。

四月。調李星沅爲兩江總督。以林則徐爲雲貴總督。

耆英奏。英人帶領兵船突入省河。嗣經委員馳往佛山。將當日在場鬪鬧之匪徒。關亞言等拏獲懲辦。英船始退去。

癸酉。賜張之萬等二百三十一人進士及第出身有差。

五月丙戌。試翰林詹事等官。擢王慶雲等四人爲一等。餘升黜留館有差。

命文慶陳孚恩在軍機大臣上行走。

八月。喀什噶爾回人滋事。授布彥泰爲定西將軍。軍務一切悉聽節制。奕山爲參贊大臣。襄辦軍務。

九月甲申。諭直隸山東河南官吏會拏捻匪。

丁酉。仍著兩江總督兼轄河務。

十月。湖南新寧縣黃坡崗地方。獠人雷再浩糾黨滋事。官兵討平之。



奕山奏勦匪獲勝。喀英二城解圍。

十二月戊午。湖南乾州廳苗人滋事。命裕泰等勦辦。

甲戌。召耆英來京。以徐廣縉署兩廣總督。葉名琛護理廣東巡撫。

道光二十八年戊申。正月甲申。湖南乾州廳苗人被勦悔罪自首。命裕泰分別懲辦。仍搜獲餘匪。

二月。命文慶無庸在軍機大臣上行走。

四月乙卯。諭兩廣湖南江西各督撫飭拏會匪。

八月甲辰。申定道府以下官員祖孫父子及外姻親族同省同府回避例。督撫與河督鹽政有關糾察者。亦令回避。

十月甲寅。大學士寶興卒。予諡文莊。

丁巳。諭劉韻珂等。飭拏浙江沿海盜匪。

申諭海疆各督撫提鎮。督飭水師堵拏洋盜。

十一月巳卯。命耆英爲文淵閣大學士。以琦善協辦大學士。仍留四川總督任。

乙酉。諭四川雲貴兩廣江西各督撫。於所屬境內確切查勘礦產。

道光二十九年己酉二月。四川中瞻對野番王布朗出巢滋事。命琦善迅速剿滅。

四月。李星沅以病免。以陸建瀛爲兩江總督。

乙巳。以山東洋盜搶掠。申諭徐澤醇。飭屬搜拿沿海村塢盜藪。

癸丑。賞徐廣縉子爵。葉名琛男爵。初鴉片之戰終局。政府許英人以五口通商。得派領事於五處。專理商賈事宜。福州廈門寧波上海已設領事。惟廣州紳民自三元里決戰後。積嫌已深。合詞請大府毋許英人入城。耆英知爲違約。又不能禁遏。及徐廣縉代爲總督。英人以兵艦入粵河。申前約。仍爲鄉練所阻。不得要領。至是。廣縉與香港總督更定廣東通商專約。遂以嚴禁入城之語載入約中。朝旨大悅。故有是賞。

閏四月辛巳。琦善奏親督漢土官兵進剿中瞻對野番。大獲勝仗。

五月庚戌。琦善奏中瞻對野番悔罪投誠。並附近中瞻對之卓巴塞爾塔野番。傾心效順。

六月。江蘇浙江安徽湖北水災。命及時籌辦賑撫。

七月戊戌。協辦大學士吏部尙書陳官俊卒。予諡文愨。

己亥。命戶部尙書祁寯藻協辦大學士。

林則徐以病免。以程喬采爲雲貴總督。張日晟爲湖南巡撫。

九月甲辰。布彥泰以病免。以琦善署陝甘總督。裕誠署四川總督。

戊申。命署吏部右侍郎季芝昌在軍機大臣上行走。

戊午。命服闋尙書何汝霖。以一品銜署禮部左侍郎。仍在軍機大臣上行走。

十月庚午。以故朝鮮國王李奂子昇襲爵。命瑞常和色本往封。

十一月丙申。予告大學士阮元卒。予諡文達。

湖南新寧縣匪徒李沅發滋事。官兵討平之。

壬戌。正陽門箭樓災。

十二月甲戌。皇太后崩。

湖南巡撫馮德馨奏。五排人李沅寶。係李沅發之弟。聞李沅發已被焚殺。定期分股前往新寧復仇。命湖廣總督裕泰由湖北省選派得力將弁數員。並挑帶精兵數百名。會同搜捕。

道光三十年庚戌。正月丙午。帝不豫。丁未。大漸。召宗人府宗令載銓。御前大臣載垣。端華。僧格林沁。軍機大臣穆彰阿。賽尚阿。何汝霖。陳孚恩。季芝昌。內務府大臣文慶。公啓鏞。匣。宣示御書皇四子奕訢立爲皇太子。是日午刻。帝崩於圓明園。苦次。

庚戌。封皇子奕訢爲恭親王。奕譞爲醇郡王。奕詝爲鍾郡王。奕誨爲孚郡王。

己未。皇太子卽皇帝位。

二月辛未。下詔求言。

四月甲戌。上大行皇帝尊諡曰。效天符運立中體正至文聖武智勇仁慈儉勤孝敏成皇帝。廟號宣宗。

丁亥。賜陸增祥等二百十二人進士及第出身有差。

五月丁酉。裕泰等奏殲除湖南匪黨。地方一律肅清。

六月癸亥。大學士潘世恩因病乞休。允之。以祁寯藻爲大學士。杜受田以刑部尙書協辦大學士。

廣西洪秀全起兵於桂平縣之金田村。初。粵西歲饑多盜。適湖南雷再浩李沅發兩次之亂。均竄至粵境。粵匪遂蠡起應之。秀全者。原籍廣東花縣。先是有朱九濤倡上帝會。亦名三點會。秀全與同邑馮雲山師事之。旋以秀全爲教主。道光十六年。秀全及雲山至廣西。在桂平武宣二縣接壤之鵬化山中傳其教。秀全妹婿蕭朝貴。桂平人。楊秀清。韋昌輝。貴縣人。石達開。先後入教。凡入教者。拜上帝。稱爲天父。天父名耶火華。以耶穌爲長子。秀全爲次子。故稱耶穌爲天兄。凡入教皆平等。

男稱兄弟。女稱姊妹。並有真言寶誥等書。密爲傳布。蓄髮藏山箐間。遣人分途至各處勸誘。附從者日衆。時廣西巡撫鄭祖琛出省勦匪。駐平樂府。秀全等遂起兵於金田村。

九月。調向榮爲廣西提督。

辛丑。授林則徐欽差大臣。迅赴廣西。則徐旋行至廣東普寧縣病卒。詔贈太子太傅。予諡文忠。

十月丙戌。頒硃諭罪穆彰阿耆英。革穆彰阿職。永不敘用。耆英降爲五品頂戴。以六部員外郎候補。

命戶部尙書賽尙阿協辦大學士。

十一月庚子。命前任兩江總督李星沅爲欽差大臣。馳赴廣西。以周天爵署廣西巡撫。

...

...

...

...

...

...

...

...

...

清史綱要卷十終

清史綱要卷之十一

咸豐元年辛亥。正月戊子。命賽尙阿爲大學士。

三月丙申。命賽尙阿爲欽差大臣。馳往湖南。辦理防堵事宜。時洪秀全自金田北走象州。李星沅與周天爵以事相齟齬。奏請專派總統。故有是命。旋星沅因病命回湖南會辦防堵。命賽尙阿馳赴廣西接辦。又以周天爵年老。命回京。授鄒鳴鶴爲廣西巡撫。星沅旋病卒。

命內閣侍讀穆蔭。以五品京堂候補。在軍機大臣上學習行走。

四月己未。命戶部侍郎舒興阿在軍機大臣上行走。

庚申。帝御乾清門聽政。自是以爲常。

甲子。以已革廣西巡撫鄭祖琛。廣西提督閔正鳳。養癰貽患。均發往新疆效力贖罪。

五月甲辰。陝甘總督琦善以勤辦黑城撒拉回子及黃喀窪番人。妄加誅戮。命革



清史綱要卷十一  
職交刑部審訊。旋發往吉林。充當苦差。

乙巳。命戶部尙書裕誠協辦大學士。

調裕泰爲陝甘總督。以季芝昌爲閩浙總督。

壬子。命工部侍郎彭蘊章在軍機大臣上行走。

閏八月。洪秀全入永安州。建國號爲太平天國。秀全自爲天王。封楊秀清爲東王。蕭朝貴爲西王。馮雲山爲南王。韋昌輝爲北王。石達開爲翼王。洪大全爲天德王。秦曰綱羅亞旺范連德胡以晄等。各稱丞相軍帥等職。

南河豐北廳河隄潰決。

十月癸卯。陝甘總督裕泰卒。予諡莊毅。授舒興阿陝甘總督。

十一月。賽尙阿督向榮烏蘭泰等攻永安。不克。遂圍之。時向榮統北路。烏蘭泰統南路。互有違言。知縣江忠源率勇從烏蘭泰軍。頗調停其間。不能得。因引疾去。

咸豐二年壬子。正月壬子。賞給綿悌之繼子奔勳貝子。命兼奉慶良郡王綿懃祭。

祀。

丁丑。閩浙總督季芝昌奏。臺灣匪徒洪紀作亂。由鎮道督兵討平。

辛酉。命裕誠爲大學士。以直隸總督訥爾經額協辦大學士。

二月。洪秀全自永安潰圍東走。總兵長瑞長壽董先甲邵鶴齡陣亡。副都統烏蘭泰受傷旋卒。秀全遂逼桂林省城。烏蘭泰於上年二月。由廣州副都統調至廣西。屢戰皆捷。及圍永安。又生擒洪大全送京師。至是。以追敵涉險受傷而逝。

四月乙巳。賜章鋈等二百三十九人進士及第出身有差。

太平軍陷全州。秀全攻桂林。向榮與巡撫鄒鳴鶴等擊卻之。遂解圍去。出興安。陷全州。乘勝入湖南境。江忠源敗之於簔衣渡。焚其舟幾盡。並礮斃馮雲山。太平軍遂棄輜重登陸。

五月。陷道州。提督余萬清棄城遁。遂分陷江華永明各縣。

七月丙寅。協辦大學士杜受田卒。予諡文正。受田爲帝師傅。故飾終之典尤渥。

太平軍陷桂陽州郴州。趨長沙。

九月己酉。以調度乖方。革大學士賽尙阿職。逮問。湖廣總督程喬采革職留營效力。授徐廣縉爲欽差大臣。署理湖廣總督。

辛亥。命訥爾經額爲大學士。仍留直隸總督任。戶部尙書禧恩吏部尙書賈楨俱協辦大學士。

十月壬辰。季芝昌以病免。調吳文鎔爲閩浙總督。以羅繞典爲雲貴總督。

甲午。冊立貴妃鈕祜祿氏爲皇后。

太平軍攻長沙。官軍擊卻之。遂陷岳州。蕭朝貴誦長沙無備。率衆由醴陵上犯。總兵和春與江忠源馳至。與敵相持。向榮亦自桂林至。會朝貴中礮死。秀全等自郴州悉衆來攻。日久不克。遂解圍渡湘而西。陷益陽。渡洞庭。時湖北提督博勒恭武守岳州。先三日遁。遂陷之。盡得吳三桂時所遺軍械礮位。

十一月甲子。協辦大學士禧恩卒。予諡文莊。

浙江布政使椿壽自盡。諭巡撫黃宗漢詳細訪察。是否另有別情。尋奏稱因庫款不敷。漕運棘手。並無別情。

太平軍陷漢陽。十二月。陷武昌。巡撫常大淳等死之。時太平軍蔽江而東。所過城鎮。望風而靡。總督程番采在衡州。旋革職遣戍。命張亮基署理湖廣總督。

己亥。授葉名琛兩廣總督。

乙亥。命丁憂侍郎曾國藩。在湖南原籍。幫同辦理本省團練鄉民。搜查土匪諸事務。

辛丑。徐廣縉逮問。授向榮爲欽差大臣。

命兩江總督陸建瀛爲欽差大臣。進防江皖。

命琦善爲欽差大臣。由河南進剿。琦善先已釋還。令署河南巡撫。至是。以防太平軍北竄。故有是命。

咸豐三年癸丑。正月。太平軍東下。至廣濟之武穴。陸建瀛兵潰退。九江安慶俱失。

清史綱要 卷十一  
守安徽巡撫蔣文慶等死之。向榮收復武昌。建瀛逮問。命怡良爲兩江總督。

二月。豐北河工合龍。

江寧失守。將軍祥厚等死之。已革總督陸建瀛被戕。向榮率兵追至江寧。遂結營城外孝陵衛。

太平天國丞相林鳳祥等陷鎮江揚州。並由揚州分兵踞臨淮關。入鳳陽府。又至浦口。攻六合。秀全與楊秀清謀。欲分兵守江南。而自率衆由淮安北趨。有一老舟子言。北路無水乏糧。遇困莫解。不如踞南京爲都。秀清信之。乃遣林鳳祥羅大綱李開芳等北行。

壬寅。行用官票。命於京師先行。

三月丁卯。定各省捐貲備餉。准廣文武鄉試中額及文武試學額例。

四月。琦善率師圍揚州。初。琦善由信陽州。與提督陳金綬學士勝保。敗敵浦口。遂進攻揚州。旋總督慧成查文經福濟等。均率師來會攻。侍郎雷以誠亦募勇防揚。

州東路。

己亥。賜孫如僅等二百二十二人進士及第出身有差。

太平軍由鳳陽擾河南。陷歸德府。攻開封。爲官軍所敗。遂圍懷慶。立爲柵城。與官軍相持。

五月戊申。始製銀鈔。

福建會匪滋事。同安廈門失守。

福建漳州府及延平府土匪滋事。永安沙縣失守。鎮道被戕。旋即收復。  
鑄當十大錢。

太平軍攻南昌。分陷各府。湖北臬司江忠源擊卻之。時楊秀清遣胡以晄攻安徽桐城。破集賢關。遂再陷安慶。又遣賴漢英石祥貞攻九江湖口。進圍南昌。巡撫張芾拒守。適湖北臬司江忠源來援。屢戰皆捷。

六月。命各直省行堅壁清野法。

侍郎雷以誠始行抽收釐金於揚州。初以誠以巡視黃河隘口。請捐貲募勇。自成一軍。因江都之仙女鎮各會館。舊有抽收釐金章程。遂仿行以濟軍需。坐賈則按月收捐。爲板釐。行商則設卡抽捐。爲活釐。按獲利之厚薄。約取百中之二三。其後各省皆仿行之。軍餉賴以得濟。

庚辰。命訥爾經額爲欽差大臣。尙書恩華將軍托明阿幫辦軍務。赴河北進剿。豐北河工復決。

七月。河北軍破敵木柵。遂解懷慶圍。

湖南軍馳援江西。初。丁憂侍郎曾國藩。在湖南湘鄉原籍。團練鄉兵。仿明戚繼光編束隊伍法。創爲湘勇營。其制每營五百人。擇官紳誠樸者率之。日事訓練。先討土匪。皆平之。湘勇遂以勁旅稱。至是。敵圍南昌。並入江西腹地。江忠源飛書湖南請援。國藩與巡撫駱秉章。派湘勇馳援。時吉安土匪圍城。一戰解之。

八月己卯。調吳文鎔爲湖廣總督。以慧成爲閩浙總督。裕瑞爲四川總督。

太平軍由懷慶破山西平陽府。遂入直隸境。訥爾經額既解懷慶之圍。凱旋還直隸。方次臨洛關。先一日。有冒官軍旗幟責州縣供張者。蓋敵已由潞城黎城間小徑入關矣。官軍遇敵。倉皇失措。遂大潰。訥爾經額以數十人走入廣平府。旋並山西巡撫哈芬。均逮問。以勝保爲欽差大臣。桂良爲直隸總督。

前署兩江總督楊文定以奏報軍務失實。逮問。旋遣戍。

九月辛亥。授惠親王綿愉爲奉命大將軍。科爾沁郡王僧格林沁爲參贊大臣。保衛畿疆。京師戒嚴。

太平軍解南昌圍。趨九江。遂入湖北境。官軍失利於田家鎮。黃州漢陽二府復陷。十月。太平軍陷深州。攻天津。踞靜海縣。分屯獨流楊柳青等處。

命曾國藩酌帶練勇。馳赴湖北協剿。

戊寅。命恭親王奕訢在軍機大臣上行走。

以麟魁爲總管內務府大臣。勿庸在軍機處行走。命侍郎瑞麟穆蔭在軍機大臣



上行走。

上海土匪劉麗川踞城。命巡撫許乃釗勤之。

太平軍由安慶踞集賢關。入桐城舒城。侍郎呂基賢死之。遂圍廬州。

十一月。安徽穎毫捻匪滋事。踞雉河集。給事中袁甲三擊敗之。捻者。捏也。不逞之徒。聚捏成隊。肆劫掠。俗謂之捻子。江南之淮徐海。安徽之穎毫壽。河南之南汝光。山東之兗沂曹濟。湖北之襄棗鍾隨。其民類多慄悍。其股無慮千百。此次初稱亂於淮河。袁甲三駐臨淮關剿之。殄戮甚衆。各捻轟定。

甲辰。以和春爲江南提督。

閩浙總督王懿德奏克復廈門。

丁巳。定私鑄大錢罪名。時行用當百當十大錢。及鉛錢鐵錢。私鑄者衆。雖用嚴刑。勿能止也。

乙丑。行官票寶鈔。凡民間完納地丁錢糧。及一切交官解部協撥等款。均准以官

票寶鈔五成爲率。官票銀一兩。抵制錢二千。寶鈔二千。抵銀一兩。與大錢制錢相輔而行。

勝保攻天津。敗退。副都統佟鑑天津縣知縣謝子澄死之。

太平軍自揚州潰圍竄瓜州。革琦善等職。留營效力。

廬州失守。巡撫江忠源死之。以援救不力。革舒興阿職。以福濟爲安徽巡撫。與提督和春。規畫廬州。田家鎮旣敗。忠源突圍至廣濟。旋授安徽巡撫。以廬州事急。遂由六安州進。時胡以晄率衆十餘萬。圍攻廬州。忠源入城拒守月餘。城陷。死之。事聞。照總督例賜卹。予諡忠烈。

咸豐四年甲寅。正月壬寅。授易棠陝甘總督。

僧格林沁勝保等攻破獨流。太平軍分竄束城陳官桃園九等村莊。

湖北官軍敗於黃州。總督吳文鎔死之。先是太平軍犯省城。巡撫崇綸欲逃。文鎔力止之。及敵退。崇綸大憾。凡所籌畫。百計齟齬。又奏文鎔閉門自守。有詔詰責。文

鎔不得已。出駐黃州。至是。師潰。死之。崇綸旋亦逮問。畏罪自殺。

二月辛巳。以台湧爲湖廣總督。時湖北德安諸郡縣均陷。台湧駐隨州。巡撫青麐守武昌。

乙未。晉封貴人那拉氏爲懿嬪。

太平軍遣孫寅三等陷安徽太平府。結壘三十餘。直達江干。爲金陵聲援。

楊秀清遣石祥貞會漢黃各軍。溯江陷岳州。分擾靖江。並入湘陰城。

三月。太平軍自皖北入山東。逼臨清州。河北之太平軍。自獨流破後。勢已窮蹙。天王密令安徽之兵。由豐工渡河。破金鄉縣臨清州。旋爲官軍克復。餘衆走保冠縣。鄆城曹縣。旋亦爲官軍悉數殄除。

壬子。革山東巡撫張亮基職。遣戍。因勝保參其欺飾冒功也。

曾國藩統水陸師。敗太平軍於湘潭。遂與塔齊布克復湘潭縣。此爲湘軍初興。第一次奇捷。

四月己丑。予告大學士潘世恩卒。予謚文恭。

五月。高唐州失守。太平軍自獨流破後。走保阜城。又踞連鎮。至是。又分股南破高唐。

湖南常德府失守。太平軍由湘潭竄陷常德。

六月。武昌失守。布政使岳興阿等死之。巡撫青麐棄城遁長沙。旋命正法。革台湧職。以楊霈代之。

楚軍復岳州。

七月。江南軍克復太平府。

閏七月。琦善卒於軍。命前江寧將軍托明阿督辦揚州軍務。

八月。曾國藩督水陸各軍敗太平軍於武昌。遂復武昌漢陽二城。並復黃州。

十月。揚州軍敗太平軍於浦口。

十一月甲申。革四川總督裕瑞職。以其收受陋規辦案錯誤也。以黃宗漢爲四川

總督。

雲貴總督羅繞典卒。以恆春代之。

庚寅。祁寯藻致仕。命賈楨爲大學士。

咸豐五年乙卯正月。江蘇巡撫吉爾杭阿克復上海縣城。斬劉麗川。

楊霈敗於廣濟。時官軍圍九江急。太平軍乃分軍擾上游。楊霈不設備。倉皇突圍走蕪水。太平軍遂陷漢口。入襄河。湖北大擾。

僧格林沁等攻破連鎮。擒林鳳祥。河北肅清。僧格林沁由郡王進封親王。

二月。僧格林沁等復高唐州。太平軍餘衆踞馮官屯。

三月。武昌復陷。巡撫陶恩培等死之。命胡林翼署湖北巡撫。林翼以翰林改官貴州知府。四年。率黔勇勦匪。由湖北通城援武昌。累升湖北布政使。屢戰於小河口。鷓鴣洲。至是署巡撫。聚軍上游。力圖進取。

四月。僧格林沁破馮官屯。擒李開芳等。北軍告蕨。賞僧格林沁親王。世襲罔替。西

凌阿三等男爵。撤大將軍參贊大臣。京師解嚴。

西安將軍扎拉芬於隨州陣亡。德安失守。

己未。革楊需職。以官文爲湖廣總督。官文爲荊州將軍。屢破敵於岳家口仙桃鎮。及復宜昌沔陽天門等處。至是。命爲湖廣總督。赴襄陽督師。

五月壬戌。命察哈爾都統西凌阿爲欽差大臣。馳往湖北。督辦軍務。並命荊州將軍綿洵爲幫辦。

六月。下北廳蘭陽汛銅瓦廂三堡河隄漫溢。

七月壬戌。尊康慈皇貴太妃爲康慈皇太后。

庚午。皇太后崩。

壬午。諭。恭親王奔訢。於一切禮儀。多有疏略之處。著勿庸在軍機大臣上行走。並開去宗人府宗令正黃旗滿洲都統缺。

命戶部尙書文慶在軍機大臣上行走。

湖南提督塔齊布卒於軍。塔齊布由侍衛揀發都司。在湖南疊著戰功。超升提督。素以智勇著名。所向無堅敵。至是將攻九江。以力盡心悸而卒。予諡忠武。

楚軍克蔡店。拔漢口鎮。

八月。福濟奏擒匪張洛刑等。復踞雒河集。

九月癸亥。大學士卓秉恬卒。予諡文端。

庚午。命戶部尚書文慶兩廣總督葉名琛俱協辦大學士。名琛仍留兩廣總督任。乙酉。以官文爲欽差大臣。督辦湖北軍務。時西凌阿綿洵以久攻德安未克。命革職。並逮問提督孔廣順。命官文赴德安督勦。德安旋即克復。

十月。和春福濟克復廬州府城。

十二月乙巳。命文慶葉名琛爲大學士。桂良彭蘊章協辦大學士。葉名琛桂良仍留兩廣直隸總督任。

雲南回民杜文秀起蒙化。襲踞大理府城。提督褚允昌死之。

咸豐六年丙辰三月瓜州鎮江太平軍合攻揚州陷之旋爲官軍收復革托明阿等職以德興阿爲欽差大臣翁同書幫辦軍務

寧紹台道羅澤南力攻武昌死之澤南湘鄉諸生講學宗程朱體用兼備兵興後卽倡率生徒爲團練至性感動鄉里遂率其鄉人轉戰三楚江西大小二百餘戰悉身先士卒至是力攻武昌紮營賓陽門外之洪山乘勝追勦左額中鎗子遂卒事聞命照巡撫例優卹旋予諡忠節

安徽寧國府失守太平軍由太平涇縣犯寧國陷之

辛巳以皇長子載淳生晉封懿嬪那拉氏爲懿妃

四月辛亥賜翁同龢等二百十六人進士及第出身有差

江蘇巡撫吉爾杭阿由上海進攻鎮江於高資力戰陣亡命照總督例賜卹予諡勇烈

五月江南大營失陷向榮退保丹陽江南大營因援勦寧國溧水屢經抽撥兵力



過軍。至是。江寧太平軍約鎮江之兵。來攻大營。兵勇潰散。張國樑力戰突圍。保向榮由高淳退保丹陽。旋命國樑幫辦軍務。

七月。向榮卒於軍。向榮自道光三十年調廣西提督。卽與太平軍相持。追擊東下。直抵江寧。大小千百戰。終以積勞殞於軍。奉旨優卹。予諡忠武。

癸酉。命怡良暫署欽差大臣。督辦江南軍務。

八月戊子。命黃宗漢來京。以吳振械爲四川總督。

甲午。命江南提督和春爲欽差大臣。督辦江南軍務。

太平天國北王韋昌輝。以天王洪秀全命。殺東王楊秀清。天王復殺昌輝。翼王石達開奔安慶。初。向榮卒。太平諸王相慶。秀清素以秀全爲贅疣。陰有自立意。令其下呼萬歲。秀全密召韋昌輝石達開。令圖之。昌輝先至。秀清招之飲。昌輝於飲次。刺殺之。盡殺其黨。達開至。責昌輝太酷。昌輝怒。將殺達開。達開縋城夜遁。昌輝盡殺其母妻子女。秀全懼。密諭秀清黨攻殺昌輝。

九月。擒匪西竄。逼陳州。先是。命河南巡撫英桂督辦三省勦匪事宜。至是。以匪蹤四竄。日久無功。交部議處。

易棠以病免。以樂斌爲陝甘總督。

十一月乙卯。賈植丁憂。命彭蘊章爲大學士。翁心存以吏部尙書協辦大學士。

辛未。大學士文慶卒。予諡文端。文慶在政府。嘗密請破除滿漢藩籬。不拘資地用人。曾國藩以鄉兵破敵。政府中頗有舐排之者。文慶獨時時左右之。

葉名琛奏英國領事巴夏禮駛入省河肆擾。攻擊城垣。名琛旣代徐廣縉督粵。遇交涉事。馭外人尤嚴。每接文書。輒略書數字答之。或竟不答。顧術僅於此。時英政府以巴夏禮任廣州領事。亦負氣好爭。適有華船入英籍者。官兵疑爲奸民。毀其旗。繫十三人去。英人責名琛謝罪。不得。遂以兵艦攻黃浦礮臺。名琛詰雙由。巴夏禮請入城面議。不許。至是。遂攻省城。陷之。以兵少。不久仍退還歸軍艦。粵民遂爭起暴動。凡各國洋樓。一切燒燬。

清史綱要 卷十一  
楚軍克復武昌漢陽二城。自是胡林翼經營武漢。爲東征之後援。湖北屹然爲上游重鎮。

十二月己酉。命桂良爲大學士。以譚廷襄署直隸總督。以柏葭協辦大學士。楚軍合圍九江。先是。江西自饒廣失守。敵踞湖口。楚軍水師分爲外江內湖。隔閩不通。曾國藩在南昌。葺整舟師。徐圖大舉。自武漢既定。袁州克復。湖北援軍大至。時李續賓率陸師。楊岳斌率水師。九江之圍復合。

咸豐七年丁巳。正月乙卯。晉封懿妃那拉氏爲懿貴妃。

二月。曾國藩丁憂。命楊載福彭玉麟分領其軍。

四月癸巳。怡良以病免。命何桂清署兩江總督。

五月。太平軍復犯湖北。時陳玉成由桐城。以擾湖北之黃梅廣濟蘄州等邊界。楚軍連戰卻之。

六月乙亥。恆春自殺。調吳振械爲雲貴總督。以王慶雲爲四川總督。時雲南回民

肆擾。逼近省城。恆春以堵截計窮。事處危急。與其妻在署自縊。

七月。袁甲三奏攻破鄧王姚三圩。生擒擒首李寅等。

楚軍克復瑞州府。

九月。參贊大臣法福禮奏。收復英吉沙爾喀什噶爾二城。先是。回匪由卡外竄入。英喀回城失陷。漢城被圍。官兵甫到。卽聞風潛遁。

楚軍克復湖口縣。又克彭澤縣。

十月丁丑。以雲南各屬漢回仇殺。革散貼告示。倡議殺回之侍郎黃琮御史竇埏職。從總督吳振械請也。

十一月。德興阿等克復瓜州。張國樑等克復鎮江。

十二月初。英使額爾金至粵。貽葉名琛書。約期會議償款。重立約章。名琛置不答。法美領事亦以燬屋失財。移文責償。亦不聽。英法同盟軍遂貽名琛最後書。迫令於四十八時內引去。至期不得復。遂於十二日。遣六千人登陸。十三日。據海珠礮

臺。十四日。陷廣州。名琛匿左都統署。同盟軍遂劫將軍巡撫都統等。大索名琛。得之。挾以登舟。事聞。禡名琛職。以黃宗漢代之。先令巡撫柏貴署理。自是廣州為同盟軍占領者三年。名琛被虜至印度加爾各答。死焉。

楚軍克復臨江府。

咸豐八年戊午。二月。江南軍攻克秣陵關。

三月。江西太平軍入浙江。陷江山常山開化諸邑。

勝保袁甲三解固始城圍。先是。太平軍糾豫捻犯商固。擬由光州六安。以窺湖北隨棗。勝保等擊破之。遂解固始之圍。

四月。楚軍克復九江府城。九江自咸豐三年為太平將林啟榮等占踞。已閱六年。至是。李續宜楊載福彭玉麟等。水陸夾攻。乃克之。擒斬林啟榮等殆盡。

江南軍攻克雨花臺。

黑龍江將軍奕山。與俄使木喇福岳福訂約於瑗瑋城。割黑龍江北岸地與俄。初。

俄人通商。惟恰克圖一處。自五口通商後。俄人乘隙。大改康熙時尼布楚條約。咸豐三年。行文中國。謂自黑龍江格爾必齊河上流。以達於海。未設立界標。卽屬未定之地。請派員商議。蓋自道光末年以來。俄人乘中國多事。已於黑龍江北岸。設兵屯守。殖民其地。非一日矣。四年。復以艦隊順黑龍江而下。通過瓊瑋。中國官吏止之。不得。五年。奕山與木喇福等會議界務。俄欲以黑龍江及烏蘇里江爲界。不諧而罷。次年。又遣海軍將普查欽爲全權大臣。乘艦至天津。再申前議。政府拒絕之。至是。又移住其人民於烏蘇里江口。奕山乃承政府命。與訂約於瓊瑋。於是康熙舊界自格爾必齊河。循大興安以至於海者。爲之一大變。而雍正五年約定烏特河爲兩國中立地者。更無論已。

英法聯軍陷大沽礮臺。命僧格林沁爲欽差大臣。督兵馳赴天津。京師戒嚴。聯軍旣陷廣州。貽書中國首相。欲改訂約章。增開口岸。至上海待命。旣而各國軍艦向天津。集白河口。投書直隸總督譚廷襄。仍請轉達首相。朝命侍郎宗倫等往會廷

襄議款。英人以其官小。不足當全權之任。辭不見。遂攻陷大沽礮臺。時俄美二國居間排解。乃命大學士桂良吏部尙書花沙納。赴天津議款。又賞已革大學士耆英侍郎銜。飭令赴津。耆英往拜英使。不見。懼而還京。帝震怒。賜自盡。

五月庚寅。吳振械奏。回民就撫。省城解嚴。

戊子。大學士裕誠卒。予諡文端。

太平軍自江西入閩。陷邵武等郡縣。

乙未。起復兵部侍郎曾國藩。馳赴浙江。辦理軍務。時浙江處州失守。恐前派督辦浙江防剿事宜總兵周天受資望較淺。未能統率各軍。故有是命。旋處州克復。浙江全境肅清。改命國藩援閩。

戊戌。命侍郎匡源內閣學士文祥。在軍機大臣上學習行走。

桂良等奏議款事定。英法兵艦退出天津。桂良等既至天津。英人持所定新例五十六條。要以畫押允行。其中最要者。一。增開牛莊登州臺灣潮州瓊州等處。又

於長江一帶許選擇三口。一、洋人帶眷屬在京師長行居住。一、議償商虧軍費各二百萬兩。清款後交出粵城。法人所定四十二條。與英略同。軍費賠款則減英人之半。桂良據以入告。雖一時廷臣多憤激主戰。帝以戰守均無把握。不能從也。

六月己酉。命桂良花沙納與侍郎基溥武備院卿明善。馳往江蘇。會議通商稅則事宜。

庚申。以天津失事。革譚廷襄職。遣戍新疆。以慶祺爲直隸總督。

七月。太平軍復陷廬州。時福濟以師久無功。命來京。以李孟羣署安徽巡撫。

丙申。命勝保爲欽差大臣。督辦安徽軍務。安徽巡撫翁同書幫辦軍務。袁甲三督辦三省剿匪事宜。

八月。楚軍克復吉安府。

福建軍克復邵武府。閩境肅清。

九月。揚州軍失利。府城復陷。時太平天國英王陳玉成攻浦口。德興阿營破之。遂



陷揚州。德興阿退守邵伯。旋張國樑率江南軍渡江。克復揚州及儀徵。詔撤德興阿欽差大臣。以和春兼轄江北軍。

楚軍克復安徽桐城舒城二縣。進逼安慶。

壬午。命柏葑翁心存爲大學士。以官文協辦大學士。

六合縣失守。道員溫紹原死之。六合居江寧北。以浦口爲咽喉。紹原力守六年。至是。太平軍以全力克之。

十月。楚軍失利於三河。布政使李續賓死之。先是。官文胡林翼會籌東征之策。陸師渡江。先皖而後及江南。水師先安慶而後及江寧。以圖皖之事。屬之李續賓。請加巡撫銜。專摺奏事。時太平天國英王陳玉成主皖事。旣陷廬州。於距廬州五十里之三河。屯糧械。築大城。環以九壘。防守甚嚴。續賓旣下桐舒。遂進攻三河。大戰破敵。九壘皆下。而所部傷亡亦衆。玉成暨侍王李世賢。糾合捻首張洛刑。自廬州至。抄官軍後路。四面圍裹。愈集愈厚。七營先陷。續賓知事不可爲。乘夜躍馬入敵。

陣死之。會國華及諸員弁死者六千人。湘軍精銳殲焉。續賓少從羅澤南學。爲人含容淵默。其選士以知恥近勇樸誠敢戰爲上。遇敵則人當其脆。而已當其堅。糧仗則予人以善者。而已取其窳者。所屯軍地。百姓耕種不輟。萬幕無譁。大小六百餘戰。克四十餘城。口不言功。及沒。遠近痛哭。事聞。帝震悼。命照總督例賜卹。旋予諡忠武。

勝保奏擒首李兆受獻滁州投誠。命更名世忠。以參將補用。兆受固始人。咸豐三年。降何桂珍。旋復叛。戕桂珍。至是。降於勝保。

十一月己亥。吳振械因病解任。以張亮基爲雲貴總督。徐之銘爲雲南巡撫。時振械受制回人。亮基入城。亦爲回人看守。出入均難自在。

戊辰。大學士柏葰以科場事革職。

十二月丁卯。命瑞麟爲大學士。

咸豐九年己未。正月。以太僕寺卿袁甲三督辦三省剿匪事宜。日久遷延。訖無成。

效命回京供職。以總兵傅振邦代之。從勝保奏請也。

二月甲寅。殺已革大學士柏葑等。自嘉道以來。公卿子弟。遇科場競通關節。視巍科爲故物。以通榜爲常事。戊午科場後。御史孟傳金奏中式舉人平齡硃墨不符。物議沸騰。奉旨將正考官柏葑革職。副考官朱鳳標。程庭桂解任。聽候查辦。時端華肅順方用事。以柏葑資望較深。性頗鯁直。畏而惡之。肅順爲刑部尙書。遂據刑律。坐柏葑以因家人求請撤換試卷。與同考官編修浦安。程庭桂之子程炳采等。均處斬。程庭桂等遣戍。內外簾官及新中舉人。軍流降革至數十人。慶祺卒。壬戌。以恆福爲直隸總督。

廬州官軍失利。前署安徽巡撫李孟羣死之。

太平天國翼王石達開犯湖南。達開自出金陵。與天王隔絕。連犯安徽江西福建。不得逞。至是由江西南安取道崇義。入湖南。陷桂陽州。時湘軍分援各省。兵力自弱。故達開乘虛而入。巡撫駱秉章檄召劉長佑等募勇禦之。

四月壬寅。調王慶雲爲兩廣總督。黃宗漢爲四川總督。

己未。調勞崇光爲廣東巡撫。兼署兩廣總督。

壬戌。王懿德以病免。以慶端爲閩浙總督。

乙丑。賜孫家鼐等一百八十人進士及第出身有差。

五月辛卯。大學士翁心存因病乞休。允之。甲午。命賈楨爲大學士。

英兵艦攻大沽礮臺。官軍擊卻之。桂良等至上海。會同何桂清。與四國使臣定約。畫押而還。至是。各國艦隊駛赴天津。遵例換約。大吏遣人告以大沽現在設防。不便行走。須改由北塘口進。英艦先至。抗不遵行。遽駛入大沽。開礮轟擊。官軍還擊。沈其數艦。且殺登岸兵數百。遂退去。美艦後至。遵約改道行走。

六月。石達開圍寶慶府。楚軍擊敗之。達開既入湘。圍衡州。不克。乃攻寶慶。衆稱數十萬。李續宜督諸軍大破之。城圍遂解。又破之永明道州。

陳玉成合捻黨陷安徽定遠。道員郭沛霖等死之。並陷天長盱眙。

九月。石達開犯桂林。達開自寶慶永明道州屢敗後。由新寧城步等處山僻小路。直犯桂林。巡撫曹澍鍾固守。攻之不克。遂解圍去。陷慶遠府。

戊寅。王慶雲以病免。以勞崇光爲兩廣總督。自廣州爲英占踞後。和議雖成。總督將軍皆駐佛山。不敢入城。至是。崇光始入城。

己丑。大考翰林詹事官。擢顏宗儀等二員一等。餘升黜留館有差。

十月庚子。以曾望顏署四川總督。命黃宗漢留京。以侍郎候補。

辛丑。勝保丁憂。命漕運總督袁甲三署理欽差大臣。督辦皖省軍務。

命侍郎匡源文祥在軍機大臣上行走。

江南軍敗於六合。又敗於浦口。提督周天培死之。

十一月。太平天國守池州將韋志俊內應獻城。其部下古隆賢等復攻陷之。

袁甲三克復臨淮關。

咸豐十年庚申。正月己巳。命勝保督辦河南勦匪事宜。帝以勝保督辦皖省日久。

無功。撤去欽差大臣。命馳往河南督辦該省勦匪事宜。派關保爲幫辦。袁甲三仍署理欽差大臣。督辦安徽軍務。翁同書仍爲幫辦。並添派穆騰阿幫辦。傅振邦督辦徐宿一帶勦匪事宜。田在田幫辦。德楞額督辦山東勦匪事宜。哈勒洪阿幫辦。袁甲三克復鳳陽府縣二城。生擒擒首張元龍等。

二月癸丑。加江寧布政使薛煥巡撫銜。幫辦五口通商事宜。

擒匪竄陷清江浦。太平軍將取蘇杭。豫結擒首張洛刑龔瞎子等。使擾清淮。以分江皖兵力。清江爲河漕聚匯處。居室器用。踵事華富。各擒首垂涎已久。至是。率衆由吳家墩驟至。河督庚長退保淮安。旋各路援軍至。遂收復清江。

杭州失守。巡撫羅遵殿等死之。先是。太平軍陷涇縣廣德州。遂闖入浙江之安吉。距杭州一百數十里。巡撫告急。帝命和春兼辦浙江軍務。以提督張玉良總統援浙諸軍。至是。太平軍由武康直撲杭州。援軍未至。守陴兵寥寥。遂陷。巡撫以下死之。將軍瑞昌堅守滿城六晝夜。不陷。及張玉良至。遂克復杭州城。

三月。援浙軍克復長興縣。

閏三月。江浙軍克復廣德州建平縣。

江南大營失陷。張國樑陣亡。和春受傷卒。江南軍自上年添募壯勇。增築長圍。意謂克復金陵。在指顧間。兵將志驕。各方有急乞援。輒分兵應之。孤軍轉鬪。往往累月不能歸。存營兵力漸薄。又以軍饟不繼。擬每四十五日發一月之糧。軍心攜貳。至是。太平軍糾合各路精銳。猛撲大營。張國樑苦戰八晝夜。勢不能支。至夜。各營火起。遂退守丹陽。敵踵至。國樑力戰創甚。躍入河中。死之。和春突圍走常州。受傷嘔血死。國樑初名嘉祥。廣東嘉應州人。始爲盜。後率所部於南寧鎮投誠。時頗有疑之者。巡撫周天爵知其忠勇。保護甚至。繼隨向榮轉戰數省。所向無敵。及幫辦江南軍務。東南半壁。倚如長城。至此。遂力竭捐軀。事聞。奉旨優卹。予諡忠武。同時陣亡者。有湖北提督王浚。壽春鎮總兵熊天喜等。

四月。常州失守。總督何桂清遁。桂清以籌餉駐常州。及敵至。倉皇遁走。蘇州巡撫

徐有壬不納。退往常熟。復避至上海。旋奉旨逮問。

蘇州失守。巡撫徐有壬死之。蘇省爲東南財賦區。自常州不守。藩籬盡撤。守兵脆弱不習戰。遂失守。有壬等死之。太平軍遂陷松江等郡縣。并浙江之嘉興府。

庚辰。命荊州將軍都興阿督辦江蘇江北軍務。

癸未。命曾國藩署兩江總督。

命薛煥署欽差大臣。辦理五口通商事宜。

甲申。命兵部郎中左宗棠以四品京堂候補。襄辦曾國藩軍務。

壬辰。賜鍾駿聲等一百八十三人進士及第出身有差。

五月甲午。以薛煥爲江蘇巡撫。暫署兩江總督。

六月壬申。命彭蘊章毋庸在軍機大臣上行走。初。蘊章力保何桂清。至是。桂清敗。故有是命。

丙戌。實授曾國藩兩江總督。並命爲欽差大臣。督辦江南軍務。國藩奉命後。以破



敵必據上游。應以江楚為根本。遂節進兵。遂徵集兵勇。部署峻整。是月。進駐祁門。以固吳會人心。兼壯徽寧聲勢。

七月。英法兵陷天津。英兵自上年敗退後。謀大舉入犯。初。僧格林沁經營防務。頗以北塘為地勢扼要。至是。朝命撤北塘之備。退就大沽。英法兵遂由北塘進內港。抵新河。以七百人登陸。僧格林沁以勁騎蹙之。為精利火器所殲。三千騎得脫者。七人而已。於是英法兵輪進攻大沽。時僧格林沁為朝野所倚重。帝恐其寄身命於礮臺。特旨令退守。又命大學士瑞麟等統京旗兵九千防通州。是月初五日。大沽遂陷。提督樂善死之。僧格林沁退次通州張家灣。初七日。英法兵據天津。

丁未。以崇實署四川總督。

八月己巳。帝秋獮木蘭。自圓明園啟鑾。丁丑。至熱河。駐避暑山莊。英法兵既據天津。命侍郎文俊前粵海關監督恒祺。往津議約。英法人拒不納。改命桂良。得英人照覆。要以增軍費。開天津為商埠。並各國酌帶數十人入京換約。皆巴夏禮主之。

桂良奏聞。嚴旨拒絕。英法兵遂擾河西務。畿輔大震。是月初一日。英法兵薄張家灣。勝保禦之。傷頰墜馬。師奔。僧瑞二軍亦退至京城外。帝知禁兵不足恃。遂北狩。熱河。鄭親王端華。尙書肅順。軍機大臣穆蔭。匡源。杜翰等皆扈從。恭親王奕訢留守。仍督僧瑞二軍駐師海淀。方英法軍之逼通州也。帝命怡親王載垣赴通議約。桂良。穆蔭皆在。英參贊巴夏禮帶十餘人入城。載垣等與之宴。巴夏禮言。今日之約。須面見皇帝。載垣答以須請旨定奪。巴遂佯睡不復語。載垣不得已暫退。會有馳告英將額羅金將襲我者。載垣無措。密告僧格林沁。設法擒巴夏禮解京。及帝出狩。奕訢。桂良駐城外。惟大學士周祖培。尙書陳孚恩等。會議城守。城門晝閉。英人聲言攻城。且索巴夏禮甚急。勝保請殺之。諸王大臣皆不敢決。十一日。有詔飛召南軍入援。奕訢既奉全權大臣之命。英人給照會。限三日內交還巴夏禮。二十一日。英兵攻海淀。禁兵不戰而潰。爰釋巴夏禮。巴既出。遂縱火燔圓明園。以洩忿。徽州失守。太平軍由廣德州犯徽州。皖南道李元度甫抵府城。卽被圍。至是遂陷。

九月。英法和議成。巴夏禮要奕訢至軍面訂和約。速開安定門。周祖培等允開城延入。巴夏禮帶百餘人入城。法使亦入。居間排解。先索卹款五十萬兩。如數予之。初九日。宴英使於禮部。和議成。凡條約於八年原定外。續增九條。法使亦擬續增十條。更關天津爲商埠。許派遣公使領事駐中國。償英國銀一千二百萬兩。法國銀六百萬兩。十一日換約。皆奕訢主之。旋據以奏聞。奉旨均著允准。並諭止勤王之師。

寧國失守。提督周天受等死之。太平軍由徽州分兵攻寧國。天受與皖南道福咸死守七十餘日。至是城陷。皆死之。並陷浙江嚴州。

捻黨竄入山東境。命僧格林沁往剿。

十月壬戌。張亮基以病免。以劉源灝爲雲貴總督。

丁丑。命順天府府丞毛昶熙督辦河南勦撫事宜。旋以河南巡撫嚴樹森代之。仍命昶熙幫辦。

辛巳。命荊州將軍都興阿督辦江北軍務。李若珠幫辦。

戊子。命太常寺少卿焦祐瀛在軍機大臣上學習行走。

十一月戊申。命倉場侍郎成琦往吉林。會同將軍景淳。查勘俄國分界事宜。方英法聯軍之入京也。俄使頗調和其間。和議既成。乃索厚報。與奕訢再訂北京條約。續增十五條。其第一二兩條。關係國界。故遣成琦往。會同俄官。設立界牌。

太平軍攻湖州。道員趙景賢擊卻之。

多隆阿李續宜大破陳玉成於掛車河。時官軍圍安慶急。陳玉成糾集定遠六安各股精銳。由舒城廬江上進。至桐城縣西南之掛車河等處。築壘四十餘座。圖解安慶之圍。副都統多隆阿。安徽按察使李續宜。會擊大破之。盡毀各壘。追剿直至桐城。

十二月己巳。設立總理各國通商事務衙門。命奕訢桂良文祥管理。並於內閣部院軍機處各司員章京內。滿漢各挑取八員。作爲司員定額。

命崇厚爲辦理三口通商大臣。駐紮天津。管理牛莊天津登州三口通商事務。命貴州提督田興恕爲欽差大臣。督辦全省軍務。先是石達開由廣西分兵入貴州。陷廣順永寧。時貴州巡撫何冠英卒。命興恕兼署。

丁丑。裁撤長蘆鹽政。歸直隸總督管理。

丙戌。命官文周祖培爲大學士。官文仍留湖廣總督任。以戶部尙書肅順協辦大學士。時瑞麟先以兵敗革職。彭蘊章亦因病乞休也。

咸豐十一年辛亥。正月丙午。恆福以病免。以文煜署直隸總督。

二月。陳玉成陷黃州蘄州德安諸郡縣。武昌戒嚴。時曾國荃圍安慶。玉成旣敗於掛車河。念湖北爲楚軍根本。衝其腹心。必撤圍自救。乃從英霍問道入犯湖北。思解安慶之圍。

三月辛丑。命欽差大臣勝保馳赴直隸山東。督辦防勦事宜。旋又命督辦安徽河南勦匪事宜。

四月乙亥。命左宗棠幫辦曾國藩軍務。宗棠於江皖之交。親督各軍。大敗黃文金。李侍賢各股。故有是命。

練總苗沛霖攻壽州。沛霖以生員爲團練長。始叛。爲勝保招降。以功授川北道。猶持兩端。使其下呼爲苗先生。至是。與壽州豪族仇殺。遂攻壽州。巡撫翁同書時在壽州。旋失守。同書爲所劫。詔命同書來京。以李續宜代之。

七月辛丑。帝不豫。壬寅。大漸。召宗人府宗令載垣、右宗正端華、御前大臣景壽、肅順、軍機大臣穆蔭、匡源、杜翰、焦祐瀛。承寫硃諭。立皇長子載淳爲皇太子。癸卯。寅刻。帝崩於避暑山莊行殿寢宮。

甲辰。尊皇后及生母皇貴妃那拉氏均爲皇太后。旋上皇太后徽號曰慈安皇太后。生母皇太后徽號曰慈禧皇太后。

丙午。授駱秉章四川總督。督辦軍務。秉章先已奉命入川。辦理軍務。至是。乃實授總督。又以劉蓉署四川布政使。崇實授成都將軍。並接辦川陝交界防堵事宜。

召劉源灝來京。以福濟爲雲貴總督。時雲南回匪滋擾。源灝福濟皆未抵任。張亮基告病未行。時升任陝撫布政使鄧爾恆。行次曲靖被殺。或謂巡撫徐之銘所主使。之銘荒淫誕妄。旣爲回人所制。卽倚回自重。朝廷不能治也。

八月。安慶克復。安慶陷敵已九年。楚軍自克九江後。卽漸次進兵。水陸合圍。曾國荃統領圍師。陳玉成屢謀解圍。爲多隆阿李續宜鮑超所敗。不能逞。楊載福以水師截其糧道。城外各壘。俱爲國荃掃蕩。城中糧盡援絕。至是城破。守將葉芸來以下均死。玉成遁出集賢關。於是池州桐城宿松各郡縣均收復。

太平將李侍賢陷嚴州餘杭。又分陷紹興處州各郡縣。

湖北巡撫胡林翼卒。林翼聰強敏給。事至應機立斷。其署湖北巡撫也。當武昌三次淪陷。公私掃地。無可措手。林翼乃整飭吏治。籌備餉需。農不病而課充。法不苛而吏肅。與總督官文極意交歡。籌議東征。所向克捷。以積勞咯血。至是卒。詔贈總督。予諡文忠。

因東省擒匪爲僧格林沁痛勦。奉旨優獎。

十月己酉。帝奉兩宮皇太后還京師。

丙辰。授恭親王奕訢爲議政王。在軍機處行走。命大學士桂良、尙書沈兆霖、侍郎文祥、寶鋆。在軍機大臣上行走。鴻臚寺少卿曹毓瑛。在軍機大臣上學習行走。

辛酉。殺怡親王載垣。鄭親王端華。協辦大學士戶部尙書肅順。革景壽、穆蔭、匡源、杜翰、焦祐瀛職。載垣、端華俱以咸豐初襲爵。任宗人府宗令及領侍衛內大臣等職。端華同母弟肅順。以郎中供奉內廷。尤善迎合。洊升至協辦大學士。三人盤結同干大政。軍機大臣拱手聽命而已。旣以科場事殺柏葰等。又借鑄錢局事興大獄。戶部司員皆褫職逮問。京師自縉紳以至商店。多被株連破家。怨肅順尤刺骨。英法聯軍之役。載垣等勸文宗幸熱河。迨和議成。留京王大臣疏請還京。文宗將從之。爲載垣等所尼。屢下詔改行期。及文宗崩。稱有遺詔。與景壽等共八人。爲贊襄政務王大臣。不許恭親王等奔喪。時御史董元醇疏言。皇上冲齡。未能親政。暫



請皇太后垂簾聽決。並派近支親王一二人輔政。疏入。皇太后召見贊襄王大臣。命照所奏行。載垣等抗論以爲不可。退。復以本朝無太后垂簾故事。令軍機處駁還。時奕訢已至熱河。見載垣等卑遜特甚。肅順尤蔑視之。太后欲召見奕訢。杜翰昌言於衆。謂叔嫂當避嫌疑。且太后居喪。尤不宜召見親王。肅順稱善。然奕訢終設計得獨見太后。遂密謀誅載垣等。並召曹毓瑛密擬拿問各旨。以備到京即發。議定。奕訢即還京。太后亦即下還京之旨。載垣等力阻不聽。乃議命肅順護送梓宮。載垣等扈從太后等。先從間道還京。於是大學士賈楨等合疏請太后垂簾。欽差大臣勝保亦奏請簡近支親王輔政。太后既至京師。乃下詔暴載垣等罪狀。並降旨拿問。命奕訢捧詔宣示。載垣端華二人厲聲曰。吾輩未入。詔從何來。奕訢命侍衛擒出。擁至宗人府。幽之。時肅順方次密雲。逮者至。毀門而入。遂械至京。旋廷議上。載垣端華賜自盡。肅順斬立決。景壽穆蔭匡源杜翰焦祐瀛俱革職。穆蔭發往軍臺。旋尙書陳孚恩侍郎黃宗漢等均以載垣等黨。革職遣戍有差。於是垂簾

之局定矣。

乙卯。命議皇太后垂簾之儀。

甲子。帝行卽位禮於太和殿。以明年爲同治元年。載垣等初擬建元爲祺祥。載垣等旣得罪。遂改爲同治。

諭。見在一切政務。均蒙兩宮皇太后躬親裁決。惟繕擬諭旨。仍應作爲朕意。嗣後議政王軍機大臣繕擬諭旨。著仍書朕字。

戊辰。命馮子材督辦鎮江軍務。

癸酉。命曾國藩統轄江蘇安徽江西三省。並浙江全省軍務。所有四省巡撫提督以下各官。悉歸節制。時浙江全省糜爛。省垣危急。故有是命。

十一月。乙酉朔。帝奉兩宮皇太后御養心殿。垂簾聽政。

杭州失守。將軍瑞昌巡撫王有齡等死之。時楚軍規取金陵。秀全乃令忠王李秀成侍王李侍賢。分途擾浙。以分兵力。張玉良與戰於鳳山門外。中礮陣亡。二十七

日。遂失守。越四日。滿城亦陷。

十二月庚申。上大行皇帝尊諡曰。協天翊運執中垂謨懋德振武聖孝淵恭端仁寬敏顯皇帝。廟號文宗。

定文宗山陵名曰定陵。

庚午。以沈葆楨爲江西巡撫。

丁丑。以左宗棠爲浙江巡撫。

清史綱要卷之十二

同治元年壬戌正月甲申命兵部尙書麟魁兩江總督曾國藩均協辦大學士。己亥麟魁卒時麟魁奉命至蘭州查辦陝甘總督樂斌辦理撤回縱匪殃民一案查訊得實解樂斌職命暫署陝督及卒予諡文端以沈兆霖署陝甘總督。

丙午革前安徽巡撫翁同書職拏問同書於咸豐九年六月失守定遠逃往壽州倚苗沛霖爲聲援及沛霖圍壽州又殺徐立壯等以媚之壽州旣破又力保沛霖之非叛前後奏疏自相矛盾至是爲曾國藩參奏遂命逮問旋定擬斬監候。

李世忠攻克天長江浦浦口。

太平軍犯上海英法各國兵擊退之初上海官紳立會防局議結外國兵助勦遣人航海入京請於政府許之至是太平軍犯吳淞口又踞浦東之高橋均爲美國人華爾英提督何伯法提督卜羅德擊敗華爾與白齊文教練中國兵勇習洋槍稱洋槍隊爲常勝軍旋華爾陣亡白齊文以索餉不遂投入太平軍以戈登代領

常勝軍。

二月。曾國藩遣道員李鴻章赴援上海。初。國藩議遣李鴻章別領一軍。由鎮江進規蘇常。至是。上海會防局雇備輪船。遣員至安慶迎援師。遂改令鴻章率楚軍及新募淮軍。乘輪東下。營上海城南。詔以鴻章署江蘇巡撫。而別授薛煥通商大臣。專辦交涉事件。

三月。鮑超攻克青陽石埭太平涇四縣。太平將古隆賢屯青陽城外。鮑超擊破之。遂進克各縣。

己酉。命左副都御史晏端書赴廣東。駐紮韶關。督辦通省釐金。接濟浙江等省餉需。

江西南昌民人拆毀天主教堂。命巡撫沈葆楨嚴密查拏究辦。

雲南巡撫徐之銘奏省城解圍。回人就撫。上年十一月。回民馬起等率衆進逼雲南省城。有武生馬如龍。情願解散招撫。親赴各壘勸導。立解省圍。並退出所踞各

城奉旨嘉獎如龍。命以總兵用。

四月。彭玉麟曾國荃攻克太平府蕪湖縣。並金柱關東梁山各要隘。

戊辰。命辦理山東畝捐。從僧格林沁奏請也。

多隆阿等攻克廬州府城。陳玉成奔壽州。初。苗沛霖曾受太平平北王封號。至是。玉成往乞援。沛霖遣黨迎謁。誘入城。伏兵擒之。并其部將諸王二十餘人。解送潁州。勝保軍前。勝保檻送京師。未至。詔於河南衛輝府之延津將玉成凌遲處死。玉成渾名四眼狗。勇悍。亞楊秀清。謀略過李秀成。既死。楚皖之間。太平軍遂不振。

太平軍擾陝西。先是太平扶王陳德才等。約同捻黨。由河南入陝西武關。復由孝義廳出山口。直逼西安。爲官軍擊退。遂東陷渭南。入河南南陽一帶。川匪藍大順。二順等。由雲南昭通倡亂。蹂躪全川。時亦竄入陝西。踞洋縣商州山陽等處。與陳德才等互爲應援。進攻潼關。爲官軍所敗。又圍鳳翔府城。

上海軍攻克南橋鎮。法提督卜羅德陣亡。

丁丑。上兩宮皇太后徽號曰慈安皇太后。曰慈禧皇太后。

五月。臺灣匪徒戴萬生等踞彰化作亂。命福建巡撫徐宗幹勦辦。

丙戌。賜徐郟等一百九十三人進士及第出身有差。

廣西巡撫劉長佑奏克復太平府城。先是太平府城被匪徒吳凌雲等攻陷。至是。爲官軍克復。進擣隴羅老巢。

丁酉。命荊州將軍多隆阿督辦陝西軍務。

甲辰。添設長江水師提督。駐紮蕪湖。

浙江湖州失守。道員趙景賢被執。景賢湖州人。在籍辦團。每戰必捷。洊升福建糧儲道。時湖州被圍數月。糧援俱絕。遂陷。景賢被執。不屈。至二年三月。被戕於蘇州。事聞。照巡撫例賜卹。予諡忠節。

曾國荃等攻克秣陵關等要隘。圍逼江寧。駐軍雨花臺。

六月。鮑超攻克寧國府。先是太平輔王楊輔清率衆十餘萬。踞寧國府。分股屯寒

亭等處。爲鮑超所破。至是。又連破之城外。遂復府縣城。輔清遁去。保王洪容海降。并收復廣德州。

癸酉。大學士桂良卒。予諡文端。

陝西回民作亂。圍攻省城。並擾同州蒲城等處。

七月己丑。袁甲三以病免。以安徽巡撫李續宜爲欽差大臣。督辦軍務。以吳棠署漕運總督。續宜旋丁母憂。請假還籍。屢乞病假。於二年冬病卒。予諡勇毅。

壬辰。以工部尙書倭仁協辦大學士。

署陝甘總督沈兆霖。於平番縣三道溝地方。猝遇山水漲發。冲沒殞命。事聞。奉旨優卹。

庚子。命欽差大臣勝保赴陝西督辦軍務。勝保先奉命督勤皖捻。因袒護苗沛霖。與袁甲三李續宜齟齬。旋命馳赴河洛。至是。因陝省回民猖獗。多隆阿在隨州棗陽一路布置。太平軍陳德才等又攻圍南陽。爲所牽掣。不能赴陝。故又命勝保赴



陝督辦。

以熙麟爲陝甘總督。未到任以前。由布政使恩麟署理。

甲辰。以慶端爲杭州將軍。耆齡爲閩浙總督。

丙午。命欽差大臣親王僧格林沁統轄山東河南全省軍務。並調度直隸山西兩省防兵。四省督撫提鎮以下各官。及副都統遮克敦布、河南團練大臣毛昶熙、漕運總督吳棠。均歸節制。初。僧格林沁督師山東。初戰不利。後漸削平諸教黨及土匪。至是。始命以全力剿擒。

丁未。命貴州提督田興恕赴四川。交駱秉章差遣。興恕先以意氣驕盈。行爲乖謬。被參。命繳還欽差大臣關防。毋庸署理巡撫。仍以提督辦貴州苗教各匪。至是。又以殺害外國傳教士。及奏報不實。縱寇殃民。被參。奉旨先行交部議處。仍候查辦。旋議遣戍。

八月。多隆阿攻克荆紫關。多隆阿入陝。已抵商南。時陳德才等糾合豫捻。襲踞荆

紫關。遂還師攻破之。又勦滅亳潁捻黨入陝巨股。

閏八月癸巳。命左都御史李棠階在軍機大臣上行走。

丙申。命倭仁爲大學士。

甲辰。以劉長佑爲兩廣總督。時勞崇光被參離任。旋又命崇光往貴州查辦事件。長佑未到任以前。以晏端書署理。

陳德才糾合捻黨犯湖北。陷隨州等處。圍安陸府。爲官軍所敗。復還河南。

九月丁丑。詔畿輔行堅壁清野法。時畿輔教士捻各匪蠱起故也。

十月戊子。命吏部尙書瑞常協辦大學士。

己丑。命大理寺卿曹毓瑛在軍機大臣上行走。

曾國荃擊退援金陵之太平軍。國荃駐軍雨花臺後。守城兵出戰。輒敗創。天王乃促侍王李世賢忠王李秀成還援。時左宗棠力攻衢州。世賢不克離浙。秀成先遣其國宗回援。戰不利。及八月。江南大疫。徽寧尤甚。鮑超等病不能軍。金陵圍師亦

死者山積。閏八月。秀成自蘇常率衆六十萬來援。圍官軍營數重。日夜猛攻。國荃裹創苦守。九月。李世賢自浙至。開隧道以攻。官軍亦掘內濠以阻之。相持四十六日。重圍始解。官軍傷亡五千人。國荃之弟貞幹亦以病後過勞竟死。

十一月丙辰。大學士銜管理工部事務翁心存卒。予謚文端。時心存之子同書在獄。命暫行釋放。俟百日後再行監禁。後竟免死。在甘肅軍營效力。及卒。又開復原官。予謚文勤。

己未。予告大學士彭蘊章卒。予謚文敬。蘊章在政府。以力薦何桂清被斥。及再起。條議時事。謂楚軍徧天下。曾國藩權太重。恐有尾大不掉之患。爲政府所哂。由是不獲再用。

壬戌。勝保以督辦陝西軍務。驕恣欺罔。逮問。旋賜自盡。

授多隆阿爲欽差大臣。督辦陝西軍務。

十二月癸卯。命薛煥來京。以李鴻章暫署辦理通商事務。欽差大臣。

甲辰。直隸總督文煜以辦理張錫珠股匪。預顛粉飾。革職發往軍臺。副都統遮克登布發往新疆。調劉長佑爲直隸總督。

同治二年癸亥。正月。浙軍克復金華府城。先是。太平侍王李世賢踞金華。圍衢州。左宗棠自開化。遂安往援。破之。及世賢往援金陵。浙軍蔣益澧。劉典等圍攻湯溪。至是克之。并克龍游。蘭溪。遂復金華府城。旋進克浦江。諸暨。並克紹興府。桐廬縣。浙東肅清。

陝軍攻克興安府城。陳得才等由湖北房竹二縣入陝境。陷興安。爲官軍克復。

二月。僧格林沁勦擒大勝。生擒擒首張洛型等。擒黨各自爲股。股各有首。以蒙亳之張洛型爲巨擘。受太平封號。跳梁楚豫江皖間。幾十年。僧格林沁總統東三盟及馬步各隊。專勦擒黨。大小數百戰。逐漸剷除。時在蒙亳一帶。勦辦。適張洛型等聚集尹家溝。遂派隊往攻。侍郎國瑞等又逕攻其雉河集老巢。二處皆破。洛型遁至宿州。爲知州英翰擒獲。正法。其從子張總愚領其餘衆。

甘肅回民滋事。固原失守。時甘回蠢動。寧夏河洲狄道平羅靈州等處。亦時撫時叛。旋又圍攻平涼府城。

貴州回教各匪連陷安南興義。分擾郎岱等廳州。

設立同文館於京師。

上海軍解常熟昭文圍。先是守常熟太平將駱國忠降於李鴻章。太平軍圍之。官軍進攻崑山太倉。爲慕王譚紹洸擊退。至是鴻章令劉銘傳乘輪船濟師。洋將戈登率常勝軍助之。遂解常熟之圍。

浦口江浦復陷。李世忠突圍出詔撤去幫辦軍務。

江南軍敗李侍賢於蕪湖金柱關。克復要隘。

雲貴總督潘鐸爲回衆所戕。先是雲南叛回蠶起。全省分裂。省城回民。亦與叛回通。魚肉良民脅制官府。巡撫徐之銘貪淫昏懦。旣爲回民箝制。因又挾回自重。雖已罷斥。而新授巡撫賈洪詔等皆不能入滇。之銘爲諸回擁護。託言不能交篆。踞

位奏事如故。潘鐸既受命署雲貴總督。毅然入滇。視事後。欲力振威權。安輯回漢。而寇盜逼處。殊難措手。回人掌教馬復初名德新。以字行。爲回教中行輩最先。推爲大酋。羣回皆隱聽號令。之銘與謀。遣人至大理招撫杜文秀。許割大理永昌麗江三府封之。德新復親至姚州議和。文秀出示。謂馬復初已允分給迤西之地矣。總兵馬如龍亦回民渠魁。慄悍好鬪。然德新如龍雖首鼠兩端。尙未顯露逆跡。潘鐸頗欲羈縻之。德新示意欲封平南王。鐸嚴拒之。馬如龍亦欲兼并迤東諸郡。而臨安土豪梁士美不服。以忠義激官紳。糾衆據險以抗。如龍請勦之。鐸不許。如龍徑率所部往攻。鐸檄士美固守。又檄他郡練衆之與如龍爲讐者。使與士美合圖如龍。其謀爲之銘洩之。德新怨懼交并。密召回酋馬榮。率黨二千餘人。冒鐸所調練衆旗幟入城。居五華書院。日出騷掠。鐸親往彈壓諭令出城。馬榮嗾衆使前。鐸大罵。遂被戕。藩司岑毓英以兵練數百。扼守藩署。臬司以下皆避入焉。之銘迎馬德新入居總督署。號令一切。德新初意召馬榮。使與官爲難。而已調停之。以

市德於總督。并解如龍之厄。及構成大釁。又欲討馬榮以示已無叛意。乃密召如龍赴省。岑毓英亦致書如龍。獎其忠誠。如龍遂還省。與毓英攻馬榮。其黨死傷過半。榮逃回武定。旋爲官軍擒。斬之。銘仍署總督。馬如龍署提督。事聞。詔潘鐸照總督陣亡例優卹。予諡忠毅。之銘革職來京。旋以勞崇光爲雲貴總督。

三月甲子。以耆齡爲福州將軍。左宗棠爲閩浙總督。

上海軍克復太倉崑山。李鴻章令程學啓與戈登。以炸礮攻克太倉。進克崑山。又令劉銘傳等由常熟進江陰。無錫。黃翼升以淮揚水師輔之。李朝斌以水師由泖澱湖達太湖。分路進規蘇州。

四月辛丑。賜翁曾源等二百人進士及第出身有差。

四川官軍生擒石達開於老鴉漩。初。達開自咸豐九年七月撤寶慶之圍。入廣西。攻桂林。不克。再走湖南。犯廣東邊。爲粵軍所敗。遣黨分擾黔滇。皆不得志。其部將中旂賴裕新出寧遠。亦爲官軍所殲。達開本蓄意入川。圖竊據。乃自率大隊。渡金

沙江。擬由邊地土司小徑入川。爲避實蹈瑕之計。時川督駱秉章。已懸重賞示諸土司。使抄其後。及達開至紫打地方。將渡大渡河。而河水適暴漲。川軍唐友耕等亦至。列營河對岸。其地左阻松林河。右阻老鴉漩河。而土司復自後偃古木塞路。達開糧罄路窮。奔老鴉漩。官軍追至。遂降。送成都斬之。并所部數千人無脫免者。達開爲秀全初起時五王之一。素蓄大志。以仁義籠絡其下。人心附之。自出金陵。獨樹一幟。滋擾六七省。蹂躪百數城。至是擒滅。太平之勢益孤矣。

五月丙寅。命晏端書來京。以毛鴻賓爲兩廣總督。

己巳。諭減蘇松太三屬賦額。從曾國藩李鴻章請也。江蘇蘇松太三屬賦額。因沿襲前代官田及籍沒諸田租額。比他省有多至一二十倍者。諭令設局分別查明。折衷議減。著爲定額。旋又命將浙江杭嘉湖三府賦額酌減。又經戶部議定。二十分中減去八分。嗣李鴻章左宗棠等奏定江浙兩省減賦之額。奉旨允行。

甘肅西寧花寺回民句結撒匪滋事。攻撲丹噶爾廳城。



貴州苗教各匪攻圍思南府。爲官軍擊退。

苗沛霖攻陷壽州。沛霖前畏楚軍之逼。讓出壽州。旋因擒獻陳玉成。詔免其治罪。至是又勾結捻黨。戕官復叛。攻陷壽州。復圍攻蒙城。踞懷遠。以抗官軍。八月乙未。以劉長佑等勦辦宋景詩股匪。日久無功。交部議處。宋景詩初以降捻。隸勝保部下。勝保逮治。復叛竄直隸。長佑奉督辦三省勦匪事宜。命數月未成功。爲僧格林沁參奏。與總兵德保按察使丁寶楨。均降級留任。

甘肅平涼府城失守。平涼被圍數月。至是。回民用地雷轟陷。回民復攻涇州。

陝西漢中府城固縣失守。太平軍糾合捻黨。由興安竄陷漢中等府縣。

九月。太平將古隆賢以石埭太平旌德三縣來降。三縣復陷後。由奉王古隆賢踞守。自堵王黃文金攻青陽。爲官軍所敗。隆賢窮蹙。遂降。

多隆阿等解鳳翔圍。鳳翔被圍十四月。至是。多隆阿遣陶茂林等轉戰而前。城圍立解。

十月李鴻章等克復蘇州。上海軍迭克吳江江陰各縣。並攻克沿太湖各卡。乃逼蘇州城而軍。李秀成力謀解蘇州之圍。既屢戰不利。潞墅關又爲官軍所奪。遂入城與譚紹洸堅守。官軍以炸礮轟城外石壘皆破。秀成以金陵待援急。留紹洸主城守事。乘夜遁去。程學啓等攻城。晝夜不息。納王郅雲官等。因副將鄭國魁通款於學啓。丁卯。遂刺殺紹洸。開齊門降。鴻章入城撫視。學啓初與雲官等約爲兄弟。至是恐降衆復叛。力請於鴻章。盡殺雲官等八王。及其黨數百人。

十一月。僧格林沁破苗沛霖於蒙城。斬之。沛霖既據壽州懷遠。欲北趨中原。號召羣捻。以蒙城扼其衝。悉衆圍之。僧格林沁督陳國瑞等往救。破其數壘。其部下之向爲陳玉成親兵者。乃殺沛霖。其黨皆降。

甘肅寧夏靈州均失守。

徐宗幹奏克復彰化縣城。旋又奏生擒戴萬生。勦滅巨股會匪。南北兩路肅清。

同治三年甲子。正月。陝西軍克復漢中府城。陳德才等既踞漢中。因金陵危急。思

率衆還援陝西巡撫劉蓉派兵邀擊。敗之。遂克復漢中府城。旋又追敗之上元觀。連克城固洋縣二城。得才等遂糾合各捻。竄入湖北境。

江寧圍師攻克鍾山天保城。遂合城圍。曾國荃駐軍雨花臺。奪取附城諸要隘。東西南三面均爲官軍所有。惟東北鍾山各壘未克。至是攻克鍾山之巔大石壘名天保城者。自此城北之圍始合。

二月丁亥。停山東畝捐。從巡撫閻敬銘請也。

蘇州軍攻克嘉興府城。程學啓進攻嘉興。揮衆肉薄登城。受槍子傷腦。昇歸。其部下遂奮攻克之。學啓安徽懷寧人。曾國荃圍安慶時。率衆來降。國藩派令隨李鴻章至上海。所向有功。至是創重。遂卒。予諡忠烈。

浙江軍克復杭州省城。初。蔣益澧攻富陽。久不下。得法國總兵德克碑洋槍隊之助。始克之。遂進薄杭州。康國器等攻餘杭。太平康王汪海洋自杭州出援。敗歸。旋左宗棠自嚴州至杭州督戰。太平海寧守將蔡元隆以城降。官軍又復桐鄉。與江

蘇軍合。至是。遂大舉攻城。守將聽王陳炳文知不能守。乘夜出走。遂克杭州。汪海洋亦棄餘姚。走德清。旋與炳文由徽州竄江西。

多隆阿攻克盤屋。受傷。旋卒。初。滇匪藍大順陷盤屋。踞之。多隆阿提師入陝。驅勦回匪。如風掃籬。陝回幾盡。將移勦甘回矣。惟盤屋未破。移師圍之。盤屋城小而固。大順百計守禦。久不能拔。朝廷以多隆阿用兵神速。訝其師久無功。嚴旨詰問。多隆阿亦自恥。困於小寇。親督諸將力攻。頭眼受傷。忍創回營。傳令諸將。此城速克。傷重亦可痊。如不克。傷輕亦不欲復活。諸將四面環攻。遂克復縣城。大順逃至漢陰。爲團練所截殺。多隆阿以黑龍江馬隊。從征楚皖。身經數百戰。生平愛士卒如骨肉。而威令嚴明。智勇兼備。屢摧巨敵。至是以創重卒。事聞。予諡忠勇。

四月。蘇州軍攻克常州府城。太平護王陳坤書守常州。李鴻章督劉銘傳郭松林及戈登之常勝軍攻克之。生擒坤書。時鎮江揚州官軍亦克丹陽。

甲申。命戶部侍郎阜保副都統文謙往封朝鮮國王李熙。

丙戌。以侍郎薛煥通政使王拯互相糾參。攻訐陰私。俱令降級調用。  
庚寅。命西安將軍都興阿督辦甘省軍務。提督雷正綰幫辦軍務。

五月乙巳。熙麟以病免。以楊岳斌爲陝甘總督。

甘肅軍克復平涼府城。平涼被回民佔踞。提督雷正綰陶茂林會攻克之。

滇匪藍二順犯陝西省城。多隆阿旣卒。副都統穆圖善接統楚軍。奉命旋楚防勦。  
二順初踞山陽。復游弋豫楚邊界。至是。疾撲西安省城。穆圖善會同劉蓉德興阿  
堵擊屢勝。旋將全股撲滅。穆圖善奉調赴甘肅。辦理西口軍務。

新疆南路回民金相印作亂。陷喀什噶爾。時浩罕爲俄所滅。其酋帕夏曰阿古柏。  
收餘衆保安集延。安集延者。浩罕八城之一也。金相印迎帕夏出山。圍喀什噶爾。  
破之。遂次第攻奪南八城。

六月。曾國荃等攻克金陵。金陵圍師自攻克鍾山石壘後。城中糧援俱絕。李秀成  
勸天王棄城同走。不聽。乃令李世賢先就食江西。而自留金陵主城守。金陵城周

百里於內築月城以禦敵。國荃百計圍攻。思築隧道轟之。阻月城勿能進。五月三十日。攻克龍膊子山陰堅壘。所謂地保城者。遂築礮臺其上。日夜轟擊。而潛穴其下。六月十六日。地道火發。城傾二十餘丈。李臣典、蕭泗孚等。蟻附爭登。城遂破天。王府火起。國荃閉城搜殺。三日夜。太平酋目三千兵十餘萬皆死。生擒李秀成。及天王之兄洪仁達等。天王已於五月二十七日服毒自殺。其子洪福瑱年十五六。爲其下挾之突圍出走。事聞。朝廷動色相慶。詔封曾國藩一等侯。國荃一等伯。李臣典一等子。蕭泗孚一等男。旣又賞僧格林沁一貝勒。官文、李鴻章均一等伯爵。楊岳斌、彭玉麟、駱秉章、鮑超均一等輕車都尉。餘各獎敘有差。李秀成等磔於市。蘇州軍攻克湖州府城。洪福瑱之出走也。堵王黃文金迎至湖州。至是。蘇州軍力攻克之。浙軍亦下安吉。文金挾福瑱走寧國。蘇州軍並收復廣德州城。

七月。僧格林沁勦平太平軍及捻黨各股於豫楚邊界。初。扶王陳德才與捻黨蔓延楚豫邊界。官文出省與僧格林沁會勦。護軍統領舒保陣亡。至是。聞金陵已破。

得才服毒自殺。端王藍成春等均降。

八月。江西軍生擒洪福瑱。太平天國亡。福瑱走廣德。後鮑超大破太平軍於許灣。黃文金挾福瑱走浙江之淳安。爲浙軍黃少春所破。文金死。福瑱輾轉走廣信。江西軍席寶田率輕兵緊躡之。及之石城。俘斬過半。卒獲之於荒谷中。磔於南昌市。天王之兄卹王洪仁政。弟干王洪仁玕。及黃文金之弟昭王黃文英等。亦已先爲席寶田所擒。於是太平餘衆。僅存李世賢汪海洋入閩一股。事聞。詔賞江西巡撫沈葆楨一等輕車都尉。並賞鮑超一等子爵。席寶田雲騎尉。

回民阿渾妥得璘參將索煥章踞烏魯木齊反。都統平瑞等死之。初。陝回阿渾妥得璘。假星命游蕩。金積河湟間。及陝亂起。出關至烏魯木齊。主索煥章家。煥章前甘肅提督索文子。素蓄異志。師事妥得璘。時都統藉防餉。勒州縣畝捐。回民無賴。倚勢苛斂。漢回因此互鬩。適提督聶布冲標兵赴南路討匪。潰歸。遂據漢城反。推妥得璘爲主。索煥章手刃提督。進圍滿城。陷之。平瑞闔門死。事聞。予世職。諡忠壯。

旋哈密吐魯番呼圖壁庫爾喀喇烏蘇先後陷。安得璘自稱清真王。

十月辛未。以新疆回民煽亂。革伊犁將軍常清職。以明緒代之。乙亥。以保恆署烏魯木齊都統。命穆圖善率師出關。

戊寅。封左宗棠一等伯爵。賞蔣益澧騎都尉。

太平餘衆李世賢汪海洋竄福建。陷龍巖漳州。按察使張運蘭兵敗。死之。

十一月。署福建提督林文察進攻漳州。兵敗。死之。

新疆庫爾喀喇烏蘇失守。伊犁被圍。旋將軍明緒奏稱已將回民擊退。立解城圍。同治四年乙丑。二月丙子。毛鴻賓緣事降調。以吳棠署兩廣總督。未到任前。由將軍瑞麟暫署。

雷正綰奏攻克固原州。

三月壬寅。命恭親王奕訢毋庸在軍機處議政。並撤一切差使。旋淳親王等先後陳奏。奕訢雖經獲咎。尙可錄用。命交王公大臣詳議具奏。經禮親王世鐸等覆奏。



均以突訢咎由自取。惟係懿親重臣。應否任用。予以自新。候旨定奪。給事中廣誠等更謂。廟堂之上。先啟猜嫌。根本之間。未能和協。駭中外之觀聽。增宵旰之憂勞。於是奉太后懿旨宣示。謂突訢信任親戚。不能破除情面。平時於內廷召對。多有不檢之處。朝廷杜微防漸。正小懲大戒。曲爲保全之意。突訢著卽加恩。仍在內廷行走。並仍管理總理各國事務衙門。

四月戊寅。命恭親王奕訢仍在軍機大臣上行走。毋庸復議政名目。以示裁抑。鮑超所部霆軍。於湖北金口地方潰散。先是。新疆危急。命鮑超募勇出關勦辦。其舊部十八營。由宋國永等率之。自江西行至金口。因勇丁不願西行。全軍潰散。由江西入閩廣。與太平餘衆李世賢汪海洋等合。

己丑。賜崇綺等二百六十五人進士及第出身有差。

僧格林沁追擒匪至山東曹州西。遇伏陣亡。先是。僧格林沁旣殲苗沛霖。淮潁以北。揭竿烏合之徒。掃刮無遺。威震中原。旣而勦擒匪於楚豫之間。因其地多山谷。

沮洳。騎不得逞。累中敵伏。喪良將恆齡。舒通額。蘇克金等。至是大股擒匪張總愚。賴文洸等。悉入山東曹州境。僧格林沁率師疾追。日夜連二三百里。自率親兵數千。先大軍行。時官軍與擒匪皆重趼羸餓。寒暑不能休息。勢且俱蹙。己丑。追及曹西。擒匪勾結。鄆北伏莽數萬。四路圍集。僧格林沁進擊。大敗。避入空堡。敵圍之數重。及夜。突圍出。降卒叛。反衝官軍。敵乘之。遂全軍敗沒。僧格林沁及總兵何建鰲。內閣學士全順皆戰死。陳國瑞僅以身免。事聞。詔以親王飾終典禮。從優議卹。予諡曰忠。並命配饗太廟。繪像紫光閣。子伯彥訥謨祜襲親王爵。並賞博多勒噶台王號。

癸巳。命欽差大臣曾國藩赴山東督師。以李鴻章暫署兩江總督。旋又命國藩督辦直隸山東河南三省軍務。

五月乙未。命醇郡王奕譞籌辦京城防範事宜。

甘肅肅州回民占踞嘉峪關。并陷肅州州城。

汪海洋自福建竄入廣東。先是浙軍會同蘇軍攻克漳州。李世賢遁。又追破之永安。閩境肅清。海洋入粵。敗粵軍於鎮平。復合靈營潰卒。勢復振。世賢尋爲海洋所殺。

六月甲午。增設安徽安廬滁和道。改鳳廬潁道爲鳳潁六泗道。增設渦陽縣。治雉河集。移鳳臺縣於下蔡鎮。

塔爾巴哈台回民叛亂。參贊大臣錫霖等死之。

淮軍劉銘傳周盛波等破任柱張總愚股匪於雉河。先是捻竄海沭。命劉銘傳等軍馳往淮徐援剿。既至清江浦。捻不得下竄。遂由沭陽西走鄆城。至是張總愚等糾合各股。攻撲雉河。國藩乃調劉銘傳周盛波進援雉河。大破之。渦河西岸。雉河之圍遂解。時國藩以捻匪漸成流寇。若匪流而兵亦與之俱流。則匪之資糧無限。而我之兵力有窮。乃定議以四省十三府州地。設四鎮重兵。安徽以臨淮爲老營。山東以濟寧爲老營。河南以周家口爲老營。江蘇以徐州爲老營。各駐大營。爲四

省之重鎮。一省有急。三省往援。以劉銘傳駐防周家口。張樹聲駐防徐州。潘鼎新駐防濟寧。劉松山駐防臨淮。以李昭慶馬隊一支。爲游擊之師。自此辦捻之局。始漸有綱紀。

九月。提督雷正綰所部譁潰。初。正綰由鄂入陝。在甘肅攻勦回民。屢摧堅敵。及進攻金積堡。失利。朝旨革去幫辦。部將胡大貴等。因師挫糧缺。遂譁潰。在固原殺掠。圍倡涇州。與回民赫明堂等之衆合併。正綰涕泣開導。百計撫循。至平涼始紮定。時金積堡回民馬化隆亦率黨將犯陝西。詔陝撫劉蓉嚴防。

十月。解陝西巡撫劉蓉職。蓉以諸生隨賂秉章入蜀。授四川布政使。蜀亂平。督軍援陝。授陝西巡撫。至是。以編修蔡壽祺言事。譏蓉夤緣。詔蓉自陳。覆奏伉直。又爲御史所糾。部議降級。旋又命復任。時西捻入陝。官軍挫於華陰。又敗於壩橋。遂奪職。終於家。

十一月壬申。禮部尙書李棠階卒。贈太子太保。予諡文清。棠階以碩望名儒。同治

清史綱要 卷一百一十一  
初以太常事卿。一歲遷至尙書。爲軍機大臣。朝廷有大賞罰。多所獻替。

命內閣學士李鴻藻在軍機大臣上學習行走。

十二月丙寅。以奉天馬賊猖獗。革將軍恩合職。以都興阿代之。命寧夏將軍穆圖善督辦甘肅軍務。

官軍蕩平太平餘衆於廣東嘉應州。汪海洋踞鎮平。霆營潰卒與海洋所部爭糧。多降於粵軍方曜。旋康國器克鎮平。海洋走平遠。席寶田破之贛南。矛傷其背。遂復走廣東。突陷嘉應州。官軍攻之。不克。海洋中礮死。其黨推嘉王譚體元主城守事。尋自南面出走。至黃沙嶂。路絕險。官軍四面蹙之。降者萬餘人。體元及諸將皆死。至是。太平餘衆始盡。

寧夏回民投誠。收復府城。寧夏回民將城池圩卡撤空。各堡回民俱移往納家厓。都興阿入城時。復將回目誅戮。並縱兵搶殺。爲穆圖善所奏。都興阿亦自認錯誤。奉旨交部議處。

同治五年丙寅正月。派知縣斌椿率同官生前赴外國游歷。從總理各國事務衙門奏請也。

伊犁失守。安集延既踞南八城。纏頭以其同類。歸附之。至是。攻伊犁九城。陷之。塔爾巴哈台失守。參贊大臣武隆阿死之。

三月。甘肅蘭州督標兵變。戕官踞城。時總督楊岳斌統軍在外。旋還省討平之。戊子。命左副都御史胡家玉在軍機大臣上學習行走。時軍機大臣兵部尙書曹毓瑛已病卒也。

四月戊戌。以馬如龍署雲南提督。時徐之銘已死。賈洪詔林鴻年皆以逗遛川境。不敢入滇奪職。以劉嶽昭補巡撫。岑毓英署布政使。嶽昭尙在貴州。毓英統師在外。勞崇光始駐貴州。至是。道路稍通。遂入省城。如龍率回弁囊鞬迎入。人心大定。文祥等奏奉天馬賊匪首伏誅。餘黨遣散。撤兵還京。先是。因馬賊由口外竄入畿輔。震驚陵寢。命文祥等率神機營督剿。至是。因殲除幾盡。撤還京師。

癸丑。大考翰詹等官。擢孫毓汶等四員一等。餘升黜留任有差。  
貴州回民龔踞興義府城。

五月甲戌。以德興阿爲塔爾巴哈台參贊大臣。未到任以前。命李雲麟署理。以榮全署伊犁將軍。

命西安將軍庫克吉泰督辦新疆北路軍務。以德興阿幫辦。

六月。左宗棠奏請於福建擇地設廠。試造火輪船。從之。旋命丁憂巡撫沈葆楨總司船政事務。准其專摺奏事。

八月癸卯。楊岳斌以病免。調左宗棠爲陝甘總督。吳棠爲閩浙總督。實授瑞麟兩廣總督。旋以楊岳斌病急求歸。以穆圖善署理陝甘總督。

九月庚午。予告大學士祁雋藻卒。贈太保。予諡文端。咸豐時。曾國藩以丁憂侍郎。起鄉兵。肅清湖北。捷書方至。文宗喜形於色。謂軍機大臣曰。不意曾國藩一書生。乃能建此奇功。鴛藻對曰。國藩以在籍侍郎。猶匹夫耳。匹夫居閩里。一呼蹶起。從

之者萬餘人。恐非國家福也。文宗默然變色者久之。及同治初。兩江總督何桂清以失律擬斬。竊藻獨上疏力救之。

十月辛丑。命左都御史汪元方在軍機大臣上行走。時李鴻藻丁憂。屢詔奪情。在弘德殿行走。仍堅請終制。

十一月丙辰。命曾國藩回兩江總督任。授李鴻章欽差大臣。專辦勤匪事宜。國藩以勤捻無功。精力太衰。不能當此大任。屢請罷斥。故有是命。

湖廣總督官文撤任聽候查辦。命譚廷襄暫行署理。初。曾國荃奏參官文貪庸驕蹇。命綿森譚廷襄馳抵湖北查辦。至是。以訊有端倪。命先行撤任。侍郎胡家玉以收受官文餽遺。革職留任。並毋庸在軍機大臣上學習行走。官文旋革去總督。仍留大學士伯爵。改爲革職留任。命來京供職。

同治六年丁卯。正月丙寅。以李鴻章爲湖廣總督。仍在營督辦勤匪事宜。調李瀚章爲江蘇巡撫。命署理湖廣總督。



辛未命左宗棠爲欽差大臣督辦陝甘軍務以劉典爲幫辦。

丙子以太僕寺卿徐繼畬總管同文館事務。

鮑超大敗捻匪於尹隆河。先是捻匪任柱賴文光牛洪李允等由河南趨湖北盤旋德安安陸之間。郭松林被圍於沙岡集。張樹珊戰死於楊家河。捻勢張甚。屯尹隆河以窺安陸。至是鮑超率霆軍由襄樊。劉銘傳率銘軍由隨棗。分路進剿。會於安陸。霆軍駐白口。銘軍駐下洋港。期以庚午日辰刻進軍夾擊。銘傳冀獨得首功。先一刻進攻。大敗。所部唐殿魁等死之。及霆軍踐期來。乃大破捻衆。殺敵萬餘。生擒八千有奇。救銘傳於重圍之中。又追敗之直河豐樂河及襄河邊。事後銘傳內慚。反以失期咎霆軍。李鴻章據以入告。廷旨嚴責鮑超。超憤鬱成疾。引發舊傷。遂乞病歸。

二月癸丑勞崇光卒。予諡文毅。以張凱嵩爲雲貴總督。

四月己丑大學士周祖培卒。予諡文勤。

劉松山大敗。擒回各匪於陝西同州。張總愚一股。自入陝後。勢張甚。省城岌岌。湘軍劉松山疾走入關。轉戰涇渭之間。大敗之。同州東北。

五月辛酉。命曾國藩爲大學士。駱秉章爲協辦大學士。均仍留總督任。

候選直隸州知州楊廷熙奏請撤銷同文館。先是京師設同文館。招生學習外國語言文字。本年又增習天文算學。御史張盛藻大學士倭仁先後請罷前議。詔不許。而命倭仁在總理各國事務衙門行走。並管理同文館事。倭仁屢辭不獲。遂託病請假。至是因旱。詔求直言。楊廷熙請都察院代奏。撤銷同文館以弭天變。並列詆各部院大臣。奉旨當此求言之際。姑不深責。惟疑出倭仁授意。命速銷假到任。倭仁乘騎到館。偶墜馬傷足。竟不視事。

擒匪東竄。至濟寧之戴廟。山東官軍失利。遂衝過運河。初曾國藩等議於山東之運河東岸。河南之賈魯河沙河西岸。沿堤興築長牆。河南長牆已於上年爲捻竄破。惟運堤屢次被攻未陷。山東賴以完固。其分汛濟寧以北東軍守之。台莊以南

湘淮各軍守之。會天旱水涸。運河成乾溝。人馬可行。擒酋任柱。賴文光等。以鄆城梁山寨有土匪勾引。率衆直犯戴廟。東軍不守。遂衝過運河東岸長牆。

七月。擒匪由海神廟渡濰河。膠萊防潰。任賴各擒過運河後。將趨登萊。李鴻章採諸將議。倒守運河。進扼膠萊。將蹙之海隅。調東豫各軍會同淮軍協守運河南堤。冒暑興築堤牆。至是。擒股疾馳回竄。屢攻防守運河各軍。不得逞。乃由海神廟以北海灘。撲渡濰河。於是膠萊之防又潰。

九月壬子。申諭各省嚴拏哥老會匪。

雲南定遠大姚兩城失陷。時劉嶽昭勦辦黔西股匪。張凱嵩方擬募勇暫駐東昭。俱未入滇。岑毓英亦在曲靖勦匪。宋延春以按察使護督篆。馬如龍攻大理失利。回省城養病。迺西回匪又陷定遠大姚兩城。

十月甲午。命侍郎沈桂芬在軍機大臣上學習行走。時軍機大臣左都御史汪元方病故也。

乙巳。派美國使臣蒲安臣往有約各國。充辦理各國中外交涉事務大臣。旋又派志剛孫家毅往。皆從總理各國事務衙門奏請也。

劉銘傳敗捻於贛榆。降人潘貴升殺任柱。初。銘傳破捻於濰縣之松樹山。又破之牟山。捻勢漸解。殘衆向諸城南趨。追至日照地方。槍傷魯王任柱。柱逕奔江蘇臨榆縣境。銘傳追破之。有潘貴升者。密信乞降。請殺任柱爲進身階。至是。乘其不備。以槍洞其腰脅。縱馬來降。捻衆遂大潰。任柱。亳州人。爲捻匪各股總頭目。飄忽善戰。旣死。餘股推賴文光爲首。

十一月。捻匪窺黃河。詔抽防軍協直東之師守黃河。時捻出沒昌濰壽光之間。屢爲官軍所敗。不得志於運防。將窺青濟黃河之濱。朝旨恐黃河防軍有失。命抽運防之師協防。

癸丑。以直隸梟匪蔓延。北趨涿州永清霸州等處。革劉長佑職。命官文署理直隸總督。長佑旋以親赴前敵。將梟匪殄除殆盡。賞給三品頂戴。命督帶所部楚勇回

清史綱要 卷十一  
籍安置。

甲子。新設布倫托海辦事大臣幫辦大臣各一缺。以李雲麟明瑤爲之。

擒匪張總愚由陝西壺口搶渡黃河。犯山西吉州。山西巡撫趙長齡及防河按察使陳湜。均革職遣戍。

十二月。擒匪竄至揚州。官軍擊敗之。生擒遵王賴文光。東捻蕩平。初。擒匪分股極多。至五年秋。始分爲二。西捻小閻王張總愚。竄陝西。東捻魯王任柱與賴文光等。出入豫鄂山東江蘇。東捻自濰縣壽光間。屢爲官軍所敗。俘斬幾三萬人。精銳略盡。至此。各股全滅。斬文光於揚州。事聞。自李鴻章以下。賞加世職等有差。

丁酉。協辦大學士四川總督駱秉章卒。贈太子太傅。予諡文忠。秉章外樸內明。於賢不肖之尤著者。口雖不言。而辨之甚精。既能推轂賢才。賢才亦樂爲之用。左宗棠以在籍舉人。就湖南巡撫張亮基之幕。秉章接任。復賓禮之。專任以軍謀。集餉練兵。選用良將。屢卻勁敵。其後督師入蜀。值蜀中藍朝鼎李短搭搭等羣寇蠡起。

蹂躪四十餘州縣。未及一年。而全蜀肅清。蜀人感之如父母。既卒。成都爲之罷市。居民多野哭巷祭。

調吳棠爲四川總督。未到任以前。以成都將軍崇實兼署。以馬新貽爲閩浙總督。未到任以前。以福州將軍英桂兼署。

庚子。以郭柏蔭署湖廣總督。

同治七年戊辰。正月庚戌。命吏部尙書朱鳳標協辦大學士。

擒匪張總愚由河南竄畿南。初。總愚既由陝渡河。犯山西吉州。復由絳州曲沃垣曲山僻小路。竄近豫疆。至是。遂由磁州廣平。直犯順德雞澤平鄉鉅鹿等處。畿南震擾。詔切責李鴻章等。均奪職。惟丁寶楨率軍先至河間。詔嘉獎。

甲子。以擒匪竄擾畿輔。京師戒嚴。命恭親王奕訢會同神機營王大臣辦理巡防事宜。旋命各路統兵大臣暨各督撫均歸節制。

癸酉。大學士賈楨因病致仕。

清史綱要 卷十一  
乙亥。命左宗棠總統直隸各路官軍。時宗棠由陝追擒入直隸境。

三月壬子。雲貴總督張凱嵩以規避革職。以劉嶽昭代之。命岑毓英爲雲南巡撫。乙亥。命朱鳳標爲大學士。

癸卯。賜洪鈞等二百七十人進士及第出身有差。

閏四月辛未。命盛京將軍都興阿管理神機營事務。授爲欽差大臣。赴天津等處。會同左宗棠李鴻章勦辦擒匪。初。擒匪既游弈畿南。李鴻章復議驅之太行黃河間。既而擒至濬滑。西犯新鄉。循河至延津。屢敗陝西軍淮軍。又自內黃趨東昌荏平德州吳橋東光。遂至天津。恭親王奏飭諸帥限一月平擒。至是限滿。左宗棠李鴻章均交部嚴議。而命都興阿爲欽差大臣。列名在左李上。以侍郎崇厚副之。岑毓英遣將收復元謀。並攻克呈貢武定祿勸徵江等城。時雲南省垣久爲迤西回匪所困。楚雄徵江各府州縣二十餘處。俱陷於匪。劉嶽昭甫自黔西進至曲靖。岑毓英先勦豬拱箐海馬姑之苗。平之。乃遣楊玉科等。繞由川境。收復元謀。進擣

環洲。將武定祿勸兩城克復。省防官軍亦屢破敵城外。旋毓英自由靖親自赴援。沿途屢破敵兵。提督馬如龍來會。毓英推誠慰勉。約共竭力報國。如龍感奮。由是雲南大局始有轉機。

六月。官軍蹙捻於荏平。張總愚赴水死。西捻平。初李鴻章建防守黃運蹙捻海東之議。郭松林等屢破捻吳橋等處。河運之防始固。鴻章以爲前東捻在黃河之南。故扼之河北。運西以蹙之於海。今西捻在河北。非扼張秋。不能合圍。張秋至臨清。運河二百四十餘里。爲黃水倒灌。積漸淤成平陸。非引黃入運。則運河無水。因令官軍挑濬淤沙。引黃入運。及捻竄運東。遂力主防運之議。旋捻南下過滄州。滄州南有捷地壩者。在運河東岸。當減河口。以時啓閉蓄洩濟運者也。減河自捷地壩至海濱牧猪港。計百餘里。橫亘東西。水漲足阻敵騎竄津之路。是時運水適盛漲。卽督軍士開壩導運入減。並就河北築牆。以爲滄青靜海屏蔽。自此敵騎所至。遂有限制。而郭松林潘鼎新周盛波等。又屢敗之海豐楊丁莊沙河等處。是月。又逼



清史綱要 卷二十一  
之於老海窪及玉林鎮隆福寺。水師又敗之於高家渡。二十八日。諸軍追擒至荏平境之廣平鎮。圍之於徒駭黃運之間。河汊紛歧。水溜泥陷。擒奔走無路。遂將大股殲除。總愚攜八騎走至徒駭河濱。下馬投水死。西擒蕩平。事聞。鴻章等開復處分加賞有差。

七月乙酉。賞勦平捻匪功。命李鴻章以湖廣總督協辦大學士。

黃河南岸榮澤汛十堡漫口。

乙未。調曾國藩爲直隸總督。馬新貽爲兩江總督。以英桂爲閩浙總督。

丁酉。命開缺兵部侍郎彭玉麟赴江皖會籌長江水師事宜。

八月乙巳。御史德泰奏請修理園庭。並以內務府庫守貴祥所擬章程。請於京外各地方按戶按畝按村鱗次收捐爲可取。奉旨責德泰喪心病狂。卽革職。貴祥發往黑龍江給披甲人爲奴。

十月戊午。李鴻藻服闋。命仍在弘德殿及軍機大臣上行走。

十二月。劉松山收撫鎮靖堡。自西捻平後。左宗棠入覲。自期以五年平陝甘之亂。十月。還西安。檄劉松山由茅津北渡入山西。乘冰橋赴陝。時土匪董福祥犯綏德。窺榆林。金順迎擊破之。松山至綏德。誦匪巢散布大小理川間。分兵攻之。破其巢以百數。遂度榆林。至靖邊。屯安定。又屢敗之。敗匪併竄鎮靖堡。堡爲董福祥老巢。其眷屬則踞靖邊縣城。松山抵鎮靖。福祥之父乞降。旋福祥亦降。收其衆十萬餘人。榆延北境。正當河套迤南。古用兵之地。自陝甘回民倡亂。人民相與團結。以與回抗。喪敗之餘。流爲盜賊。浸假失業無賴之徒。及飢軍潰卒附之。又勾結甘回。遂致戕官踞城。成爲土匪。自鎮靖受撫。官軍遂得專剿回匪矣。

烏魯木齊提督成祿奏收復肅州。自新疆陷後。屢催成祿出關。至是始報收復肅州。

同治八年己巳正月。榮工合龍。

董志原回匪棄巢徙金積堡。官軍追敗之。董志原地居秦隴要膺。今因糧絕棄去。

涇州慶陽所屬肅清。

提督高連陞劉松山所部先後變亂。連陞被戕。高連陞所部果軍。勦陝回有功。駐楊店。因所部哥老會謀變。捕之急。遂變。連陞及部將多被戕。嗣經他軍邀截。五日而事定。松山所部十營駐綏德。亦因哥老會煽亂。叛踞州城。松山馳往鎮撫。旬日而定。

二月。席寶田等敗苗教各匪。克復貴州鎮遠府衛二城。

三月。雲南澂江回復叛。襲踞府城。

五月。劉嶽昭收復尋甸。嶽昭上年冬攻尋甸失利。至是始收復。

八月。山東巡撫丁寶楨奏。太監安德海矯旨出都。舟過德州。僭擬無度。招搖煽惑。得旨著嚴密擒捕。捕得卽就地正法。旋奏於泰安拏獲正法。

收復布倫托海。初。李雲麟招集額魯特人衆。將進規伊犁。旋復遣散。遂致變叛。布倫托海被陷。雲麟亦褫職去。至是。經呼圖克圖棍噶扎勒參帶兵收復。

劉松山破回於靈州。自陝西肅清。左宗棠進兵甘肅。駐涇州。受總督印。調劉松山趨定邊花馬池。是時穆圖善狃撫議。羣回旋服。旋叛。及松山抵靈州。金積回酋馬朝清卽化隆。反側難信。屢代陝回乞降。而暗嗾其黨決秦渠水以阻官軍。陝西回酋白彥虎等。亦由黑城入金積。屢犯官軍。松山奮擊大破之。旋克復靈州。化隆又哀詞乞降。陝回不自安。皆西竄。雷正綰黃鼎又破之固原州。

岑毓英破圍攻省城各壘。省圍解嚴。自是附省各壘剗削無遺。所遣將亦先後克復富明嵩明易門安寧昆陽祿豐楚雄南安廣通大姚定遠等城。悍酋據匪二十餘萬。禽斬殆盡。

九月。署寧夏將軍金順提督張曜。破叛回於寧夏城外。先是董志原餘衆竄寧夏北擾蒙古。由鄂爾多斯入烏拉特。趨阿拉善牙帳。圍定遠營。張曜要擊於察漢綽爾。大破之。又破之紅柳樹。旋與金順會師沙金托海。鼓行而西。時寧夏回復叛。邀擊於城外。大破之。

十月。席寶田破貴州苗。克復勝秉城。

十一月丁丑。裁撤布倫托海辦事大臣等。

十二月甲辰。命李鴻章馳赴貴州。督辦軍務。以李瀚章署湖廣總督。

同治九年庚午。正月。廣東陸路提督劉松山攻馬五寨。陣亡。松山圍攻金積堡。破其附近各寨。馬化隆屢代陝回乞撫。松山令繳馬械。則以朽槍羸馬應。而晝夜修壘浚濠。如不及。又決秦渠灌官軍營。松山進攻馬五寨。飛礮中左乳。遂卒。事聞。贈太子少保。予諡忠壯。左宗棠檄其兄子錦棠代統其衆。

二月壬子。命李鴻章先赴陝西。督辦陝省援勦事宜。時馬化隆遣其黨出惠安堡。分由寧州正寧入陝西之三水。於是陝西告警。朝廷恐左宗棠所留兵不敷分勦。故有是命。旋劉典奏官軍勦辦獲勝。陝西肅清。

四月。岑毓英遣楊玉科攻克姚州。

五月。天津人民毆死法國領事。焚毀教堂。初。天津有匪徒迷拐人口。人民疑外國

教堂所爲。并傳言有挖眼剖心等事。遂聚衆焚毀各國教堂。並毆死法國領事豐大業。時曾國藩因病請假。朝命赴天津查辦。法使羅淑亞請以府縣官抵償。國藩不許。旋因國藩病增劇。法國有兵船到津。命李鴻章馳赴近畿一帶駐紮。又命毛昶熙馳赴天津。會同曾國藩查辦事件。嗣仍由國藩與法使議結。定正法滋事人民十五人。軍流二十一人。天津府知府張光藻。天津縣知縣劉傑。皆遣戍。

乙未。命侍郎崇厚爲出使法國大臣。

七月。兩江總督馬新貽被刺客。新貽赴署右箭道校閱。被張文祥刺傷脅肋。遂卒。事聞。予諡端敏。文祥訊無主使。極刑處死。

八月丁酉。調曾國藩爲兩江總督。李鴻章爲直隸總督。以李瀚章爲湖廣總督。十月乙未。命劉銘傳督辦陝西軍務。

壬子。裁撤三口通商大臣。歸直隸總督經管。頒給欽差大臣關防。兼轄山東之東海關。奉天之牛莊關。嗣後直隸總督於春融開凍後。移駐天津。封河再還保定省。

城。歲以爲常。並增設津海關道。

甘肅甘涼肅三處回匪。自額哲呢河土爾扈特竄入三音諾顏部。攻陷烏里雅蘇臺。留四日。仍回肅州。

安集延酋帕夏踞烏魯木齊。初。安得璘既踞烏垣。北路漢民。結團自保。立壯士爲之長。於是徐學功起迪化。趙興體起綏來。劉鄉約等起河西古城奇台。而學功勇畧冠一時。尤爲回人所畏。安酋帕夏聞其名。使使約和。九年。安得璘遣兵與安集延戰於庫車。敗績。安酋潛勾馬仲。自吐魯番共攻安得璘。安得璘乞降。帕夏仍令爲清真王。以馬仲爲阿奇木。總回務。其後馬仲爲學功所斬。其子馬人得襲職。與安得璘積不相能。復糾安酋攻之。閏八月。安酋拔吐魯番。與學功進攻烏垣。安得璘出禦。大敗。走死綏來。帕夏遂踞烏垣。令漢回薙髮易服。效其國俗。仍以馬人得爲阿奇木。而令學功還南山。學功大悲。與之爭戰數月。以糧罄還南山。席寶田攻克台拱。台拱苗砦以百數。革夷最大。寶田先攻旁三砦克之。進破革夷。

薄台拱廳城。苗棄城遁。遂克之。

十一月。官軍攻破金積堡。自劉松山戰死。馬化隆勢復熾。遣黨四擾。冀牽動圍師。屢卻官軍。並陷峽口。又結河狄回竄渭源。窺鞏昌。劉錦棠等邀擊屢勝。乃傍壘築隄。北抵黃渠。南接金積里許。高丈餘。闊三丈。回計大窘。化隆乃率其子馬耀邦。乞撫。錦棠勒繳馬械。嗣又屢敗其出犯之衆。斷其糧道。東南北三面回寨皆平。外援已絕。至是。化隆親詣錦棠營請罪。錦棠派弁守之。令繳馬械。毀堡垣。餘衆皆降。分別安插。化隆父子旋俱凌遲處死。化隆之父曰馬二。與穆三之祖穆大阿渾友善。穆大阿渾傳習新教。臨死。以所服白帽紅衣授化隆。囑徒衆歸其管束。穆三與其弟穆四穆五。均爲新教阿渾。自京師天津。及黑龍江吉林之寬城子。山西之包頭。湖北之漢口。均有新教徒。化隆自託神靈。羣回尊信之。比就俘。其黨見之。猶長跪。旣死。回黨遂瓦解。

貴州官軍攻克都勻府城。都勻爲苗人金幹二等占踞。前爲官軍得而復失。至是。



又攻破之。

同治十年辛未。正月。因越南匪徒滋擾諒山等處。命提督馮子材馳赴太平府。派兵應援。

壬寅。大學士官文卒。予諡文恭。

二月戊子。命瑞常爲大學士。文祥協辦大學士。

岑毓英攻克澂江府城。澂江被陷十餘年。圍攻一年。至是克之。生擒匪首馬和等。並拔江那等處。旋楊玉科又攻克賓居。收復雲龍州城。

四月辛巳。大學士倭仁卒。予諡文端。倭仁講求義理之學。一時稱爲理學名臣。甲申。賜梁耀樞等三百二十三人進士及第出身有差。

金順張曜攻克納家牖。寧夏肅清。

五月辛亥。日本使臣伊達宗城柳原前光來議訂約。命李鴻章爲全權大臣。與議於天津。旋於九月定修好規條十八條。通商章程三十三款。

俄羅斯據伊犁。初，俄國乘中國有事，漸蠶食邊界，卡倫外甌脫地，及哈薩克布魯特諸部。伊犁塔爾巴哈台遂與逼處。主是以兵六百入據伊犁，電其駐京使臣告吾總理衙門，并言欲往收復烏魯木齊。詔伊犁將軍榮全赴伊犁，收回城池，並命劉銘傳由肅州出關，規復新疆各城。銘傳旋乞假歸。

六月丙子，命瑞麟爲大學士，仍留兩廣總督任。

七月，陝回分掠西寧，白彥虎陷小南川漢堡，踞之。肅州降回亦潰叛東下，甘涼戒嚴。詔左宗棠分兵勦辦。

九月甲午，命英桂留京，以張之萬爲閩浙總督。之萬旋開缺養親。

十一月丁亥，以李鶴年爲閩浙總督。

同治十一年壬申，二月丁巳，奉皇太后懿旨，立阿魯特氏爲皇后，諡吉於本年九月。舉行大婚禮。

大學士兩江總督曾國藩卒，予諡文正。國藩初講義理學，亦宗尙考據，治古文辭。

公誠之心。形於文墨。生平公牘私函。無一欺飾語。治軍行政。務求蹈實。或籌議稍迂。成功轉奇。發端至難。取效甚遠。凡規畫天下事。鮮不效者。文章奏議。尤美。有集百餘卷行世。子紀澤襲爵。

二月丙寅。以何璟署兩江總督。

庚午。詔起彭玉麟巡閱長江水師。

甘肅河州回目馬占鰲投誠。官軍進攻河州太子寺。失利。提督傅先宗徐文秀陣亡。至是。占鰲就撫。時西寧回目馬永福亦降。

三月辛丑。大學士瑞常卒。予諡文端。

官軍攻克烏鴉坡苗砦。苗民投械乞撫者六萬餘人。貴州苗匪平。

甘肅循化撤納就撫。循化廳洮州廳岷州三屬。舊爲番族所居。史所稱枹罕羌人者也。番衆僧俗。各隸於土司。自回亂以來。番衆據險自守。與回人頻年戰鬪。傷亡頗多。至是。因土司楊元。就撫於官軍。

五月乙酉。御史李宏謨奏請勤召對。奉旨。本年入春以來。慈禧皇太后時有不適。三月以後。始月餘。未經視朝。李宏謨以逐日召見爲請。冒昧已極。傳旨嚴行申飭。庚子。命李鴻章爲大學士。仍留直隸總督任。

六月甲子。命文祥爲大學士。全慶協辦大學士。

丁卯。以單懋謙協辦大學士。

官軍克復貴州興義府城。興義久被回匪盤踞。至是。爲滇軍克復。

七月。御史邊寶泉以直隸總督李鴻章奏進瑞麥。奏稱恐滋流弊。又以永定河又復潰決。請撤銷前次保案。奉旨嘉納。

八月庚申。命單懋謙爲大學士。時朱鳳標已因病乞休也。

九月丙申。帝行大婚禮。册立阿魯特氏爲皇后。

辛丑。奉皇太后懿旨。於明年正月。舉行皇帝親政典禮。

十月己未。以大婚禮成。上皇太后徽號。

十一月。日本遣副島種臣來議改約。許之。旋於十二年四月。約成互換。

劉錦棠等解西寧圍。先是。回目馬桂源自爲署西寧知府。出城與陝回謀亂。漢民閉城拒之。桂源遂與禹得彥。崔三白。彥虎等圍西寧。劉錦棠督軍擊敗之。桂源等遁。巴燕戎格。西寧解嚴。大通諸回堡亦乞撫。

十二月。岑毓英督總兵楊玉科等克大理。杜文秀自殺。文秀踞大理。歷十八載。攻陷五十三城。西及四川。東及貴州。造禁城。擬王制。官軍進攻。皆因東南黨援牽掣。屢次失利。自曲靖。澂江。臨安。以次收復。遂得專力迤西。至是。楊玉科等已盡破趙州。蒙化等處。大理藩籬盡失。遂穴地道。破其外城。文秀窮蹙。以子女分寄其大司衡。楊榮大經畧。蔡廷棟家。而與妻妾飲毒自盡。其黨趁其未絕。昇之出城詐降。時岑毓英亦至大理。令三日內繳軍械。而密令玉科帶兵入城受降。定期與城外兵夾擊。坑敵數萬。盡破三城。獲文秀子女及楊榮。蔡廷棟等。斬之。大理肅清。旋毓英遣兵攻順寧。雲州。騰越。皆下之。全滇底定。

同治十二年癸酉。正月丙戌。以李宗羲爲兩江總督。並充辦理通商事務大臣。貴州官軍克新城。上游回匪肅清。全黔底定。

辛丑。革烏魯木齊提督成祿職。拏問。成祿屢奉出關之命。藉會攻肅州。久留不進。又訴軍糧乏。難赴哈密。左宗棠參其糜餉遷延。舉動乖張。至是。又因在高臺苛派捐輸。誣士民赴營申訴者爲叛逆。掩殺二百餘人。爲宗棠揭參。遂命逮問。以金順接統其軍。

丙午。帝親政。

二月戊午。加上皇太后徽號。

六月壬子。各國駐京使臣始於紫光閣前瞻覲。並呈遞國書。

閏六月丙戌。原任大學士朱鳳標卒。予諡文端。

九月。甘肅官軍收復肅州。關內肅清。自十一年四月。提督徐占彪等進攻肅州。屢破城外各堡。左宗棠調宋慶軍由神木赴甘助勤。西寧旣降。陶生林等亦來會。金

順馬隊亦至。三月。白彥虎竄塔爾灣。肅州回出城應之。占彪等合擊敗之。白彥虎遁關外。四月。長圍始合。閏六月。破其外城。八月。宗棠自至肅州督戰。劉錦棠亦自西寧至。因猛攻多損精銳。議增修濠壘圍之。至是。回目馬四出城就撫。諸將縱兵屠之。並斬馬四等。

十月庚子。以平肅州功。命左宗棠以總督協辦大學士。並由騎都尉改爲一等輕車都尉。金順穆圖善。宋慶。張曜等。恩賞有差。

十一月壬申。御史吳可讀以言事降調。先是提督成祿逮問至京。刑部定擬斬立決。聲明應否改爲斬監候。恭候欽定。可讀奏請將成祿立正典刑。王大臣等以其刺聽朝政。請旨究詰。帝命降調。毋庸究詰。而成祿則定爲斬監候。

同治十三年甲戌。正月丙辰。諭禁廣東闖姓賭博。

三月。全慶緣事降調。命吏部尙書寶鋆協辦大學士。

辛未。命李鴻章爲全權大臣。與祕魯國使臣會商事務。

四月丁丑。大學士單懋謙因病乞休。允之。

戊子。授沈葆楨爲欽差。辦理臺灣等處海防。兼理各國事務大臣。時有日本船避風泊臺灣。爲生番所殺。日本遂派西鄉從道率兵登岸。進攻番社。嗣葆楨抵臺。布置防務。與日本議定撫卹。七月。日本遣大久保利通到京受償款五十萬。撤兵歸國。

丁酉。賜陸潤庠等三百三十七人進士及第出身有差。

七月壬子。命左宗棠爲大學士。仍留陝甘總督任。

授烏魯木齊都統景廉爲欽差大臣。督辦新疆軍務。都統金順爲幫辦。

己巳。命停止圓明園工程。酌量修理三海。

庚午。奕訢革去親王世襲罔替。降爲郡王。其子載澂革去郡王銜貝勒。時帝與載澂戲。因微故失歡。故有是命。越日。卽奉太后懿旨賞還。

九月丁未。大學士兩廣總督瑞麟卒。予諡文莊。以英翰爲兩廣總督。



乙丑。予告大學士賈楨卒。予諡文端。

十月己亥。帝不豫。命軍機大臣李鴻藻代批答章奏。時帝好微行游宴。遂以致疾。十一月己酉。諭。朕於本月遇有天花之喜。所有內外各衙門陳奏事件。呈請皇太后披覽裁定。

命寶鋆爲大學士。

十二月甲戌。李宗羲以病免。以劉坤一署兩江總督。

帝疾大漸。酉刻。崩於養心殿東暖閣。兩宮皇太后御養心殿西暖閣。召親王奕諤、奕訥、奕譞、郡王奕誨、奕詳、貝勒載治、載澂、公奕謨、御前大臣伯彥訥謨祐、奕劻、景壽、軍機大臣寶鋆、沈桂芬、李鴻藻、內務府大臣英桂、崇綸、魁齡、榮祿、明善、貴寶、文錫、弘德殿行走徐桐、翁同龢、王慶祺、南書房行走黃鈺、潘祖蔭、孫貽經、徐卨、張家驥、入。奉懿旨。立奕訥之子載湉承繼文宗顯皇帝爲子。入承大統。爲嗣皇帝。並奉懿旨。俟嗣皇帝生有皇子。卽承繼大行皇帝爲嗣。時載湉年甫四齡。卽由醇王府

移居禁中。卽皇帝位。以明年爲光緒元年。

丁丑。兩宮皇太后俞王大臣奏請。垂簾聽政。

癸未。准醇親王奕譞奏請。開除所管各項差使。並命以親王世襲罔替。

侍講王慶祺以素行有虧。爲御史陳彝所參。奉旨革職永不敘用。

丙戌。大學士九卿會同議上。大行皇帝尊諡曰。繼天開運受中居正保大定功聖智誠孝信敏恭寬毅皇帝。廟號穆宗。

戊子。封皇后爲嘉順皇后。

乙未。以聲名平常。被御史奏參。革內務府大臣貴寶文錫職。又斥革太監張得喜等。

清史綱要卷十二終